



Adolygiad o Drefniadau Llywodraethu Presennol Cadw

Adolygiad annibynnol a gynhaliwyd
ar gais Gweinidogion Cymru.

Rhagfyr 2023

Castell Dolbadarn, Gwynedd.



Cynnwys

Cyflwyniad	4
Cefndir a chyd-destun	6
Methodoleg a dull	8
Rhagair i'r argymhellion	10
Argymhellion	12
Atodiadau	24
Geirfa termau a dolenni defnyddiol	35

Cyflwyniad

1.1 Mae gwaith Cadw o bwys mawr i Gymru. Mae'n gwarchod, yn sicrhau, yn diogelu ac yn cadw llawer o'r pethau sy'n ein gwneud ni pwy ydym ni. Yn bwysicaf oll, mae'n hyrwyddo dealltwriaeth y cyhoedd, a'u mwynhad, o amgylchedd hanesyddol Cymru, a mynediad ato. Mae Cadw yn darparu cyswllt hanfodol â'n cymynroddion diwylliannol, hanesyddol, ysbrydoledig ac esthetig, sydd yn ei dro yn meithrin ein chwilfrydedd, ein dychymyg a'n creadigrwydd. Mae Cadw wedi dangos bod amgylchedd hanesyddol a reolir ac a rennir yn hwyluso gwell lles cymdeithasol ac economaidd. Nid yw'n syndod felly bod Cadw yn Asiantaeth Fewnol o fewn Llywodraeth Cymru. Mae statws asiantaeth o'r fath yn golygu bod Cadw yn isadran o Lywodraeth Cymru ac yn atebol i weinidogion am weithredu a rheoli'r sefydliad ac am gyflawni ei swyddogaethau. Er bod modelau eraill yn bosibl ac y gellid eu harchwilio yn y dyfodol, ar hyn o bryd mae gan Cadw sale sy'n fuddiol o ran diogelu hanes a threftadaeth Cymru ar gyfer cenedlaethau'r dyfodol.

1.2 Mae Cadw yn ei amrywiol gyfathrebiadau yn datgan, 'Cadw — er lles pawb. For us all, to keep'. Mae Cadw i bob pwrpas yn wasanaeth amgylchedd hanesyddol o fewn Llywodraeth Cymru sy'n gweithio gyda ni i gyd i helpu i ofalu am dreftadaeth eithriadol Cymru.

1.3 Mae Cadw yn fusnes pwysig i ymwelwyr ac mae ganddo gyfrifoldeb statudol dros warchod a darparu mynediad diogel i'r cyhoedd i'r 131 o safleoedd hanesyddol yng Nghymru sydd dan ei ofal. Yn ogystal, mae Cadw yn awdurdod rheoleiddio, sy'n gyfrifol am nodi adeiladau hanesyddol a henebion o bwysigrwydd cenedlaethol sydd angen eu gwarchod naill ai trwy restru neu gofrestru, a pharciau a gerddi hanesyddol drwy gofrestru. Mae Cadw yn goruchwyllo'r drefn gydsynio ar gyfer rheoli newid sy'n effeithio ar y lleoedd hanesyddol hyn ac yn cefnogi Gweinidogion Cymru i ddatblygu polisi a deddfwriaeth i gefnogi amgylchedd hanesyddol Cymru.

1.4 Yn 2022–23, roedd gan Cadw 252 o swyddi pobl (nid oedd pob un wedi'i llenwi), gan ddenu dros 1.1 miliwn o ymwelwyr i'w safleoedd â staff, ynghyd ag amcangyfrif pellach o 1 miliwn o ymwelwyr â'i safleoedd heb staff. Cynhyrchodd y sefydliad £9.64m o incwm o'i weithgareddau masnachol a rheolodd gyllideb gyfalaf o tua £10m ar gyfer cadwraeth hanfodol eiddo mewn gofal, gwella cyfleusterau ymwelwyr a grantiau cyfalaf i berchnogion eiddo hanesyddol. Derbyniodd gyllid gan Lywodraeth Cymru o tua £9m ar gyfer cymorth refeniw, gyda chyfanswm cyllideb o tua £28m, i gyd wedi'i amlygu yn y tabl (Atodiad 6.1) ac *Adroddiad Blynyddol Cadw 2022–23* (Atodiad 6.2). Nid yw ehangder a chymhlethdod gwaith Cadw i'w tanbrisio

1.5 Ym mis Rhagfyr 2022, cyhoeddodd Dawn Bowden AS, Dirprwy Weinidog y Celfyddydau, Chwaraeon a Thwristiaeth ('Y Dirprwy Weinidog'), sefydlu Grŵp Gorchwyl a Gorffen (GGG) i 'Ystyried trefniadau llywodraethu cyfredol Cadw a pha mor effeithiol ydynt ar gyfer ei weithredu a darpariaeth ehangach o wasanaethau treftadaeth gyhoeddus ar lefel genedlaethol ledled Cymru' (Atodiad 6.3). Mae'r term 'gwasanaethau treftadaeth gyhoeddus' yn cyfeirio, yn y cyd-destun hwn, at ddarparu gwasanaethau sy'n ymwneud â'r amgylchedd hanesyddol. Dyma, mewn gwirionedd, yw'r briff ar gyfer yr adolygiad hwn.

1.6 Gofynnwyd i mi sefydlu, arwain a chadeirio'r GGG ac adrodd yn ôl i'r Dirprwy Weinidog yn ddiweddarach yn 2023. Mae'n bwysig pwysleisio na chafodd yr adolygiad hwn ei sbarduno gan unrhyw bryderon sylweddol gan Lywodraeth Cymru nac unrhyw randdeiliad ynghylch Cadw, ac na chefais unrhyw dasg heblaw arwain yr adolygiad ar y briff a amlinellwyd uchod.

1.7 Mae amserlennu'r adolygiad hwn yn seiliedig ar ymrwymiad a roddwyd yn 2017 pan sefydlwyd model llywodraethu presennol Cadw. Mae Cadw, fel llawer o sefydliadau, yn wynebu heriau sylweddol yn yr hinsawdd economaidd bresennol ac mae'r pwynt hwn, ochr yn ochr ag awydd ac uchelgais Cadw ar gyfer gwelliant parhaus, yn tanlinellu amseroldeb yr adolygiad hwn.

1.8 Roeddwn i'n ffodus o gael Jane Richardson, Cadeirydd Bwrdd Cadw, ac Emma Plunkett-Dillon, cyn-Gyfarwyddwr Cynorthwyol Ymddiriedolaeth Genedlaethol Cymru, ochr yn ochr â mi fel rhan o dîm cydlynu. Cawsom gymorth gan Gwilym Hughes, Pennaeth Cadw, a Christopher Jeynes, Rheolwr Uned Fusnes Cadw. Gyda'n gilydd, fe wnaethom nodi a ffurfio GGG; cytunodd y Dirprwy Weinidog ar eu penodiad ar 5 Ebrill 2023 a'i gyhoeddi mewn 'Datganiad Ysgrifenedig' (Atodiad 6.4).

1.9 Roedd y GGG yn cynnwys arbenigwyr o bob rhan o'r DU yr oedd eu gwybodaeth a'u profiad yn berthnasol i'n briff, ynghyd â chynrychiolwyr staff Cadw a chynrychiolwyr undebau llafur (a restrir yn Atodiad 6.5).

1.10 Mae'r ddogfen hon yn distyllu gwaith y GGG gyda gwybodaeth, barn a safbwynt yn cael eu casglu gan ystod eang o sefydliadau, unigolion ac, yn bwysicaf oll, staff ac aelodau Bwrdd Cadw. Mae'n ymdrech tîm annibynnol a diolchaf i'm holl gyd-weithwyr am eu gwaith caled, eu hymrwymiad a'u cyfeillgarwch yn ystod yr adolygiad hwn a phawb a fu'n helpu, cefnogi a chyfrannu at y gwaith hwn. Er mwyn annog astudiaeth ddilyniannol o'r ddogfen fer hon, nid oes crynodeb gweithredol.

1.11 Rwyf wedi ceisio mynd i'r afael â'r adolygiad ar yr egwyddorion, y diffiniadau, yr amcanion a'r arddull a gynhwysir yn yr atodiadau amrywiol isod. Mae Atodiad 6.6 yn ddiffiniad awgrymedig o lywodraethu; mae Atodiad 6.7 yn nodi'r egwyddorion sy'n llywio ein hymagwedd a'n harddull at yr adolygiad; ac mae Atodiad 6.8 yn tynnu sylw at brif amcanion yr adolygiad. Cytunwyd ar yr egwyddorion, y diffiniadau a'r amcanion hyn cyn i'r GGG gynnal yr adolygiad gan y Dirprwy Weinidog, a chan y GGG.

1.12 Yn ystod 2023 rwyf wedi cael y pleser a'r fraint o ymweld, ac mewn sawl achos, ailymweld â nifer o adeiladau, henebion a lleoedd hanesyddol yng ngofal Cadw ledled Cymru. Ymwelais â sawl safle hefyd, nad ydynt yng ngofal uniongyrchol Cadw, er eu bod yn cael eu gwarchod fel henebion cofrestredig ac wedi elwa o grantiau Cadw ar gyfer eu rheolaeth weithredol.

Roedd y croeso a gefais gan dîm Cadw, a'r angerdd, y mewnwelediad a'r wybodaeth a rannwyd yn ostyngedig ac yn ysbrydoledig. Gwahoddwyd staff Cadw i gymryd rhan mewn arolwg, a oedd yn ddadlennol — diolch o galon iddynt oll. Adolygodd cwmni allanol yr holl ymatebion a darperir crynodeb o'r canlyniadau yn Atodiad 6.12. Mae'n werth ailadrodd yma y datganiad a wnaethant ar ddechrau eu hadroddiad:

'Mae staff Cadw yn rhannu'r un angerdd am eu gwaith ym maes treftadaeth. Yn gyffredinol, maent yn parchu sgiliau ei gilydd ac yn mwynhau'r cyfeillgarwch. Mae'r rhai mewn rolau sy'n wynebu ymwelwyr yn mwynhau rhannu eu hangerdd ag ymwelwyr. Mae ymdeimlad o falchder wrth weithio i Cadw, gan wybod bod y swydd yn gwneud gwahaniaeth go iawn.'

Rwy'n llwyr gefnogi'r datganiad hwnnw. Mae Cadw, heb os, yn sefydliad gwych, sy'n cyflawni'n uchel, sy'n dathlu ac yn atgyfnerthu hunaniaeth Gymreig, wedi'i staffio gan bobl ryfeddol, ac yn haeddiannol mae'n rhywbeth i ni i gyd ei drysori a bod yn falch ohono.

Roger Lewis

Cadeirydd, Adolygiad Llywodraethu Cadw, Rhagfyr 2023



Yn y llun mae Roger Lewis (chwith) a Gwilym Hughes, Pennaeth Cadw, yng Nghastell Caernarfon, Gwynedd.

Cefndir a chyd-destun



2.1 Ym mis Chwefror 2017, roedd adolygiad o sector treftadaeth Cymru, o'r enw *Cymru Hanesyddol: Ar drywydd Llwyddiant, Cadernid a Chynaliadwyedd ar gyfer Treftadaeth Cymru* (Atodiad 6.9) yn cynnwys cynnig y dylai Cadw ddod yn 'gorff elusennol neu'n asiantaeth weithredol y tu allan i Lywodraeth Cymru'. Mewn ymateb i'r cynnig hwn, comisiynodd y Gweinidog ar y pryd achos busnes i ystyried y gwahanol fodelau gweithredu posibl ar gyfer Cadw. Daeth *Ffrwd Waith Cymru Hanesyddol — Cadw: Achos Busnes dros Newid* ym mis Hydref 2017 (Atodiad 6.10) i'r casgliad bod y dadleuon o blaid ac yn erbyn Cadw o fewn y Llywodraeth yn gymharol gytbwys. Fodd bynnag, argymhellodd Cadw aros yn y Llywodraeth, ond gyda chywres o welliannau busnes i'w alluogi i weithredu'n fwy effeithiol. Byddai hyn yn y bôn yn rhoi statws 'Asiantaeth Fewnol' i Cadw.

2.2 Cafodd casgliadau'r asesiad hwn eu hystyried a'u cytuno gan Gabinet Llywodraeth Cymru ym mis Hydref 2017. Cytunwyd hefyd y byddai angen cyfnod o bum mlynedd er mwyn i'r trefniadau newydd gael eu sefydlu cyn y dylid cynnal adolygiad. Roedd y flwyddyn 2022 yn nodi pumed pen-blwydd y penderfyniad hwn ac ysgogodd y Dirprwy Weinidog i gyhoeddi ym mis Rhagfyr 2022 ei bod yn bryd ystyried pa mor effeithiol oedd y gwelliannau busnes newydd o ran rhoi'r hyblygrwydd sydd ei angen ar Cadw wrth weithredu o fewn y Llywodraeth.

Uchod: Aelodau anweithredol Bwrdd Cadw. O'r chwith i'r dde: Gaynor Legall, Liz Girling, Jane Richardson, Steven Foulston a Peter Wakelin.

2.3 Amcan Ffrwd Waith Cymru Hanesyddol — Cadw: *Achos Busnes dros Newid* oedd caniatáu cymaint o ryddid a hyblygrwydd â phosibl i Cadw ei alluogi i wireddu ei potensial masnachol yn llawn ac adeiladu ar ei gynnydd sylweddol yn nifer yr ymwelwyr a'i aelodaeth. Roedd yn ystyried ystod eang o opsiynau y gellid eu profi yn erbyn y status quo o gadw Cadw o fewn y Llywodraeth. Roedd yn cydnabod bod manteision posibl o symud y sefydliad i statws mwy hyd braich. Fodd bynnag, roedd hefyd yn derbyn bod Cadw wedi perfformio'n dda dros y blynyddoedd diwethaf wrth fod yn rhan o'r Llywodraeth a bod heriau ariannol, deddfwriaethol ac AD mawr i greu sefydliad hyd braich newydd. Roedd hefyd yn cydnabod bod rôl Cadw o gefnogi datblygu deddfwriaethol a pholisi mewn sefyllfa well o fewn y Llywodraeth.

2.4 Argymhellodd Ffrwd Waith Cymru Hanesyddol — Cadw: *Achos Busnes dros Newid dros Newid* y dylai Cadw aros y tu mewn i Lywodraeth Cymru ond y dylid rhoi nifer o welliannau busnes ar waith i hwyluso cynllunio gwell a darparu mwy o hyblygrwydd ar recriwtio o fewn cyllidebau. Byddai'r gwelliannau hyn yn caniatáu i Cadw barhau i ddatblygu ei fusnes ymwelwyr a'i weithgareddau masnachol yn ogystal â chefnogi'r gwaith hanfodol o reoli a diogelu treftadaeth Cymru a chyflawni ei gyfrifoldebau deddfwriaethol a pholisi.

Y prif welliannau busnes oedd:

- Sefydlu bwrdd gweithredu mewnol ar gyfer Cadw, sy'n cynnwys gweision sifil o Lywodraeth Cymru, arbenigedd allanol a chynrychiolydd staff.
- Sefydlu system ffurfiol o ddirprwyo a rhyddid mewnol, gan gynnwys ar faterion ariannol, gweithredol, AD a chaffael. Byddai'r dirprwyaethau hyn yn galluogi Cadw i gael mwy o hyblygrwydd gweithredol gan barhau i weithredu'n effeithiol o fewn fframwaith rheoli mewnol Llywodraeth Cymru, a chydag atebolrwydd llawn i Weinidogion Cymru.
- Cyllideb dwy flynedd a ddirprwyir i Fwrdd Cadw gan Weinidogion Cymru ac wedi'i chlymu â chynllun busnes tair blynedd. Yn bwysig, byddai hyn yn rhoi hyblygrwydd ar recriwtio o fewn cyllidebau a gallai fod ynghlwm wrth strategaethau masnachol a chynhyrchu incwm.

2.5 Cefnogwyd y casgliadau hyn gan Gabinet Llywodraeth Cymru ym mis Hydref 2017 a chytunwyd ar y rhyddid a restrir uchod wedi hynny gyda Phwyllgor Gwaith Llywodraeth Cymru. Ychwanegiad pwysig oedd penodi'r Cyfarwyddwr Diwylliant, Chwaraeon a Thwristiaeth ('rhiant-adran' Cadw) Swyddog Cyfrifo Ychwanegol (SCY) Cadw. Byddai'r ddirprwyaeth o benderfyniadau recriwtio penodol yn cael eu trosglwyddo i SCY Cadw ac roeddent yn gysylltiedig â thargedau incwm masnachol ac yn cael eu llywio gan gyngor a ddarperir gan Fwrdd Cadw. Yn y modd hwn, byddai'r Bwrdd yn rhoi sicrwydd i'r SCY ynghylch rheolaeth ariannol Cadw a chyflawni amcanion ei gynllun busnes.

2.6 Cafodd pandemig Covid-19 ym mis Mawrth 2020 effaith fawr ar weithrediad Cadw a'r trefniadau newydd hyn. Cafodd yr henebion eu cau dros dro i'r cyhoedd ac ataliwyd yr holl waith cadwraeth, ac eithrio gwaith diogelwch hanfodol.

2.7 Cafodd y trefniadau dirprwyo y cytunwyd arnynt eu hatal hefyd ac nid ydynt wedi'u hadfer eto. Fel y nodir isod, mae atal parhaus y dirprwyaethau hyn yn cael effaith negyddol barhaus ar effeithiolrwydd gweithredol Cadw.

2.8 Sefydlwyd Bwrdd Cadw ddiwedd 2018 a chyfarfu am y tro cyntaf yn gynnar yn 2019. Gwnaethant barhau i gwrdd yn rhithwir drwy gydol y cyfnod Covid. Cwblhaodd aelodau'r Bwrdd eu tymor llawn cyntaf yn 2022. Mae rhai bellach wedi'u penodi i ail dymor, ac mae aelodau ychwanegol wedi cael eu recriwtio i ddod ag arbenigedd arbenigol pellach i mewn.

2.9 Mae'r heriau ariannol sy'n wynebu Llywodraeth Cymru a'r sector cyhoeddus yng Nghymru wedi cynyddu'n fawr yn ystod yr adolygiad hwn ac mae'r GGG yn ymwybodol o'r pwysau ariannol ar Cadw. Mae'r GGG yn annog Cadw i barhau i gynllunio yn y tymor hir yn y cyfnod anoddaf hwn, yn barod i weithredu eu penderfyniadau ystyriol pan fydd y foment yn codi.

Methodoleg a dull

3.1 Cyfarfu'r Tîm Cydlynu'n rheolaidd drwy gydol y broses adolygu a gyda'i gilydd, fel y soniwyd, nododd GGG cymwys a gymeradwywyd gan y Dirprwy Weinidog. Gofynnwyd i'r GGG ddatgan unrhyw fuddiannau o wrthdaro posibl a chrëwyd cofrestr 'buddiannau'.

3.2 Cyfarfu'r GGG yn 'rithwir' ar 25 Ebrill 2023 a chytunodd ar ei ddull yn seiliedig ar nodyn briffio gan y Cadeirydd, a oedd yn amlinellu pwyntiau 6.5, 6.6 a 6.7 yn yr atodiadau atodedig isod.

3.3 Cynhaliodd y GGG gyfweiliadau un-i-un gydag ystod o arweinwyr o sefydliadau perthnasol, a chydag arbenigwyr a rhanddeiliaid o Gymru a thu hwnt (cawsant gyfraniadau ysgrifenedig hefyd). Bu'r GGG hefyd yn cyfweld â nifer o aelodau staff Cadw, adrannau a chyrff Bwrdd Cadw a Llywodraeth Cymru a Phenaeithiaid Adrannau perthnasol. Mae pob un o'r rhai yr ymgynghorwyd â nhw wedi'u rhestru yn Atodiad 6.11.

3.4 Gwahoddwyd staff Cadw i gymryd rhan mewn arolwg ar-lein (Atodiad 6.12).

3.5 Cynhaliwyd gwaith y GGG rhwng mis Ebrill a mis Hydref 2023 a rhannwyd nodiadau ac allbynnau'r cyfarfodydd hyn gyda holl aelodau'r GGG drwy gronfa ddata ganolog.

3.6 Adolygodd aelodau'r GGG hefyd nifer o ddogfennau perthnasol i Cadw a gyhoeddwyd dros y blynyddoedd diwethaf, a nodir rhai ohonynt yn yr Atodiad.

3.7 Yn ystod y broses adolygu, rhoddodd y Cadeirydd ddiweddariadau i'r Dirprwy Weinidog a'r Cyfarwyddwr Diwylliant, Chwaraeon a Thwristiaeth am gynnydd yr adolygiad.

3.8 Aeth Cadeirydd yr adolygiad i gynhadledd staff Cadw ym mis Chwefror 2023 i gyflwyno'r adolygiad iddynt, ac aeth i gyfarfod wyneb yn wyneb â Bwrdd Cadw hefyd. Bu'n rhyngweithio â staff Cadw mewn amryw o safleoedd ledled Cymru lle roedd digon o gyfleoedd i gael sgysiau agored heb fod uwch aelodau o staff yn bresennol.

3.9 Daw'r argymhellion o'r symiau helaeth o dystiolaeth ac arsylwadau gan aelodau'r GGG annibynnol. Cytunwyd ar y ddogfen hon gan y GGG cyn ei chyhoeddi.

Gwaelod-chwith: Gwnaeth Roger Lewis gwrdd ag un o Wardeniaid Henebion Maes cyntaf Cadw yng Nghastell Llangybi, Sir Fynwy, safle nad yw dan ofal Cadw ond sydd wedi elwa o grant gan Cadw yn 2022–23.

Gwaelod-dde: Roger Lewis gyda thîm Cadwraeth Cymru yn Hen Gastell y Bewpyr, Bro Morgannwg.





Rhagair i'r argymhellion

4.1 Barn y GGG yw bod cenhadaeth a phwrpas Cadw, yn ddarostyngedig i'r pwyntiau a wnaed yn yr argymhellion, yn cael eu gwasanaethu orau drwy aros, ar hyn o bryd, fel Asiantaeth Fewnol Llywodraeth Cymru, gan gadw ei holl swyddogaethau a chyfrifoldebau o fewn un endid. Nid oedd y farn hon yn deillio o gais penodol i adolygu statws Cadw, ond o awydd i gymeradwyo'r safle a fabwysiadwyd yn 2017, ar yr amod bod y pwyntiau a wnaed yn argymhellion yr adolygiad hwn yn cael eu hystyried a'u gweithredu'n briodol mor llawn â phosibl.

4.2 Dylid cydnabod gwaith yr Adran Diwylliant, Chwaraeon a Thwristiaeth, (ADChaTh), gyda'i Chyfarwyddwr yn adrodd i'r Dirprwy Weinidog, am wneud gwaith rhagorol wrth gefnogi Cadw mewn sawl ffordd, yn enwedig trwy Covid, a helpu i fynd i'r afael â chyfrifoldebau Cadw o gynnal a chadw henebion. Mae'r synergeddau trawsadrannol a'r cyfleoedd i Cadw fod o fewn yr ADChaTh yn sylweddol. Ar ben hynny, mae perthynas unigryw Cadw â'r cyhoedd hefyd yn rhoi cyfleoedd i Lywodraeth Cymru ar gyfer math gwahanol o ymgysylltu â'r cyhoedd. O fewn Llywodraeth Cymru, mae gan Cadw gyfle i ddatblygu a llywio polisi a all fod o fudd i amgylchedd hanesyddol Cymru gyfan, megis amaethyddiaeth a defnydd tir, a chynllunio ac adfywio. Mae'n gallu cyd-fynd yn uniongyrchol â'r Brand Cymru/Wales cenedlaethol, gyda'r potensial i helpu i lunio yn ogystal â thynnu arno.

4.3 Mae tîm Cadw i'w longyfarch am gyflawni ei genhadaeth a'i bwrpas yn drawiadol ar draws ei holl feysydd cyfrifoldeb niferus ac amrywiol dros y blynyddoedd diwethaf, yn enwedig yn ystod ac ar ôl y cyfnod Covid — gweler *Adroddiad Blynyddol Cadw 2022–23* (Atodiad 6.2).

4.4 Mae safle Cadw fel Asiantaeth Fewnol Llywodraeth Cymru yn darparu'r sefydlogrwydd ariannol i alluogi Cadw i ymdopi â llawer o amgylchiadau annisgwyl a mynd i'r afael â'r heriau sylweddol sy'n wynebu llawer o sefydliadau heddiw. Mae sefydlogrwydd ariannol o'r fath hefyd yn caniatáu i Cadw ganolbwyntio ar flaenoriaethau'r *Rhaglen Lywodraethu* a chael mynediad at adnoddau ac arbenigedd o fewn y Llywodraeth nad ydynt yn fforddiadwy i'w cadw'n fewnol.

4.5 Efallai nad yw'r manteision o fod o fewn y Llywodraeth yn cael eu teimlo'n gyfartal ar draws Cadw. Mae polisi, mewn amgylchedd sy'n cael ei ddominyddu gan bolisi, yn eistedd yn dda ac mae swyddogaethau rheoleiddiol yn perfformio'n dda. Fodd bynnag, mae'n bosibl y bydd cyflawni gwaith cadwraeth Cadw yn fwy heriol yn yr amgylchedd hwn ac ystyrir bod darparu profiad masnachol i ymwelwyr yn anos fyth. Mae'n anochel bod cyfleoedd ar gyfer gwaith mwy arloesol yn y meysydd hyn yn heriol yn yr amgylchedd llywodraethu presennol.

4.6 Teimlir bod gan Cadw, gyda cenhadaeth a phwrpas mor bwysig, y potensial i sicrhau mwy fyth o fanteision i Gymru a thu hwnt. Nid yw'r heriau o fewn y strwythur llywodraethu presennol yn ei atal rhag gweithredu ond maent yn ei atal rhag gwireddu'r holl gyfleoedd posibl ar gyfer twf.

4.7 Mae Adroddiad 2017 — *Ffrwd Waith Cymru Hanesyddol — Cadw: Achos Busnes dros Newid* (Atodiad 6.10) — yn cydnabod yr un potensial o ran twf a chyflwyno cyfres o argymhellion a gynlluniwyd i yrru'r newid sydd ei angen i wireddu'r potensial hwn. Heb os, gwnaeth Covid darfu'n ddifrifol ar y rhaglen newid ac nid yw argymhellion adroddiad 2017 wedi cael eu gweithredu'n llawn. Mae cyfle nawr i ailosod y rhaglen am newid.

4.8 Ni ddylid tanbrizio'r awydd a'r gydnabyddiaeth am newid gan y mwyafrif o'r rhai sy'n ymwneud â'r adolygiad. Dylid ystyried angerdd y sylwadau, y farn a'r safbwyntiau mewn ffordd gadarnhaol iawn gan eu bod yn cael eu hysgogi gan y gwaith gwych y mae Cadw eisoes wedi'i gyflawni ac y bydd Cadw yn parhau i'w wneud er budd cenedlaethau'r dyfodol.

Mae cyflawni gwaith cadwraeth a phrofiad ymwelwyr masnachol yn ddau faes sy'n dod â heriau i safle Cadw o fewn y Llywodraeth.

Isod: Un o seiri maen Cadw wrth ei waith.

Gwaelod: Y gofod manwerthu yng Nghastell Caernarfon, Gwynedd.

4.9 Wrth wraidd adolygiad 2023, mae'r GGG yn argymhell y prif gamau canlynol sydd â'r potensial i wella perfformiad Cadw. Mae'r camau gweithredu wedi'u strwythuro o amgylch y themâu canlynol:

Thema A — Creu mwy o ystywythder, hyblygrwydd a deinameg i Cadw drwy ddychwelyd awdurdodau dirprwyedig cytunedig i Uwch Dîm Gweithredol Cadw, gan barhau fel Asiantaeth Fewnol Llywodraeth Cymru.

Thema B — Egluro rôl Bwrdd Cadw ac i'r Bwrdd ddatblygu perthynas agosach ac uniongyrchol â'r Dirprwy Weinidog ochr yn ochr â Chyfarwyddwr yr ADChaTh, neu gyda'r gweinidog a'r adran sy'n gyfrifol am Cadw yn y dyfodol. (Noder, rydym yn argymhell bod Cadw yn aros o fewn yr ADChaTh.)

Thema C — Canolbwyntio ar bobl ac addasu prosesau a gweithdrefnau Llywodraeth Cymru lle maent yn ymwneud â Cadw, yn enwedig o ran Adnoddau Dynol, caffael a recriwtio, hyrwyddo a chadw staff. Sicrhau bod y prosesau a'r gweithdrefnau yn briodol i'r gwaith, sgil y staff a'r materion a'r heriau penodol sy'n wynebu Cadw. Yn bwysicaf oll, sicrhau bod camau gweithredu yn cael eu cyflawni mewn modd amserol.

Thema D — Atgyfnerthu partneriaethau sy'n cefnogi rôl Cadw yn y sector a gwasanaethau treftadaeth ehangach trwy berthnasoedd agosach â sefydliadau diwylliannol, creadigol, hanesyddol ac ymwelwyr ledled Cymru a'r DU.

Thema E — Gwella rhai o weithgareddau eang Cadw i gynorthwyo ei ddiben craidd, gan gynnwys adeiladu ar waith masnachol Cadw fel atyniad a menter fasnachol sylweddol i ymwelwyr, a'i rôl fel ceidwad a hyrwyddwr treftadaeth hanesyddol Cymru.

Thema F — Cefnogi Cadw i fod i bawb a chofleidio Cymru fodern drwy ei waith a'i arferion.

4.10 Bydd yr amserlen ar gyfer gweithredu'r argymhellion, sydd i'w cymeradwyo gan y Dirprwy Weinidog, yn gofyn am gynllunio ac amserlennu gofalus a gwaith pellach mewn rhai meysydd. Nid yw'r rhestr ganlynol mewn trefn gronolegol ar gyfer gweithredu, ond awgrymir bod y deg argymhelliad canlynol o flaenoriaeth uchel: 5.1; 5.2; 5.3; 5.4; 5.7; 5.8; 5.10; 5.11; 5.12; a 5.18.

4.11 Mae wyth o'r argymhellion (5.13; 5.14; 5.15; 5.16; 5.20; 5.24; 5.28 a 5.29) yn cael eu hystyried yn rhai nad ydynt yn ymwneud â llywodraethu yn uniongyrchol ond maent wedi cael eu nodi a'u cadw'n glir gan ei bod yn bwysig eu dal yn yr adolygiad hwn. Mae'r diffiniad o lywodraethu yn Atodiad 6.6 yn ddigon eang i fynd i'r afael â phryderon o'r fath.



Yr argymhellion

Thema A — Creu mwy o ystwythder, hyblygrwydd a deinameg i Cadw drwy ddychwelyd awdurdodau dirprwyedig cytunedig i Uwch Dîm Gweithredol Cadw, gan barhau i fod yn Asiantaeth Fewnol Llywodraeth Cymru.

5.1 Argymhelliad 1

Dylai Bwrdd Cadw, Pennaeth Cadw a Chyfarwyddwr yr ADChaTh gwrdd i ystyried argymhellion a goblygiadau'r adolygiad hwn. Dylent gytuno ar amserlen ar gyfer eu gweithredu, nodi pwy sy'n gyfrifol am weithredu pob cam, a chynnig dull gweithredu i'r Dirprwy Weinidog. Yn dilyn yr adolygiad hwn ac adborth gan y Dirprwy Weinidog, byddai'r GGG yn croesawu nodyn byr ar yr hyn a gytunwyd.

Fel rhan o'r broses hon, dylid ystyried adroddiad 2017, *Ffrwd Waith Cymru Hanesyddol — Cadw: Achos Busnes dros Newid* (Atodiad 6.10) ochr yn ochr â'r adolygiad hwn gan ei fod yn cynnwys nifer o bwytiau sy'n ysgogi'r meddwl sy'n deilwng o'u hystyried yn y dyfodol, ond yn ystyriol o'r hinsawdd economaidd bresennol.

Dylid cytuno ar gyllideb benodol o ran y staff ychwanegol a'r cyllid sydd ei angen i fwrw ymlaen ag argymhellion yr adolygiad hwn. Bydd angen i hyn fod yn ychwanegol at y gyllideb bresennol sy'n ofynnol i Cadw gyflawni ei swyddogaethau craidd niferus a'i gynllun busnes cytunedig, wrth ystyried y pwysau ar y pwrs cyhoeddus.

5.2 Argymhelliad 2

Dylid adfer rôl yr SCY ar gyfer Cadw, a gafodd ei atal yn gynnar yn ystod Covid, gan gynnwys dirprwyo penderfyniadau staffio a recriwtio priodol sy'n gysylltiedig â thargedau incwm masnachol a'u llywio gan gyngor a goruchwyliaeth gan Fwrdd Cadw.

Teimlir y dylai'r rôl hon gael ei dal yn uniongyrchol gan Bennaeth Cadw sydd â chyfrifoldeb gweithredol o ddydd i ddydd ac yn y bôn yn cyflawni'r rôl uwch weithredol. I adlewyrchu hyn, dylid ystyried teitl y Prif Weithredwr yn hytrach na Phennaeth Cadw, fel yn y gorffennol diweddar.

Dylai Pennaeth Cadw/Prif Weithredwr barhau i adrodd i Gyfarwyddwr yr ADChaTh i gadw'r synergeddau a'r berthynas waith agos gyda'r ADChaTh ehangach. Byddai'r trefniant hwn yn hwyluso'r ddirprwyiaeth o lefelau awdurdodau ariannol, staffio, caffael a recriwtio priodol, sylweddol ac wedi'u diffinio'n glir i Bennaeth Cadw er mwyn galluogi mwy o ystwythder, hyblygrwydd, gwneud penderfyniadau symlach a chyflymder cyflwyno ar gyfer Uwch Dîm Gweithredol (UDG) Cadw.

Yn ogystal ag adrodd i Gyfarwyddwr yr ADChaTh, dylid craffu a herio Pennaeth Cadw ar lefel strategol briodol gan Fwrdd Cadw. Bydd yr argymhelliad hwn yn gofyn am gyngor ac arweiniad arbenigol gan swyddogion Llywodraeth Cymru i sicrhau y gellir ei weithredu'n effeithiol.

5.3 Argymhelliad 3

Dylai Bwrdd Cadw, UDG Cadw a Chyfarwyddwr yr ADChaTh gyfarfod â thîm llywodraethu priodol Llywodraeth Cymru a gofyn am ailedrych ar *Ddogfen Framwaith Asiantaeth Fewnol Cadw, 2017*. Dylent greu dogfen newydd sy'n diffinio'n glir y berthynas gydweithredol newydd arfaethedig rhwng Bwrdd Cadw, UDG Cadw a'r ADChaTh. (Mae enghreifftiau o ddogfennau defnyddiol yn bodoli o fewn Llywodraeth Cymru megis y trefniadau recriwtio dirprwyedig ar gyfer Arolygiaeth Gofal Iechyd Cymru ac Arolygiaeth Gofal Cymru.)

Dylai'r ddogfen newydd amlinellu'n glir y prosesau, cyfrifoldebau a lefelau awdurdodau gwneud penderfyniadau mewn perthynas â'r Bwrdd, SCY Cadw, UDG Cadw a swyddogion a gweinidogion Llywodraeth Cymru. Mae angen a budd sylweddol i ddirprwyo'n glir i Cadw sawl maes a amlinellir yn yr argymhellion hyn a fydd yn galluogi Cadw i fod yn sefydliad mwy hyblyg ac ystwyth.



Llys Rhosyr yn Ynys Môn, llys brenhinol tywysogion Gwynedd, oedd heneb rhif 131 i ddod o dan ofal Cadw yn 2023.

Thema B — Egluro rôl Bwrdd Cadw ac i'r Bwrdd ddatblygu perthynas agosach ac uniongyrchol â'r Dirprwy Weinidog ochr yn ochr â Chyfarwyddwr yr ADChaTh, neu gyda'r gweinidog a'r adran sy'n gyfrifol am Cadw yn y dyfodol.

5.4 Argymhelliad 4

Dylai Bwrdd Cadw (a gynrychiolir gan Gadeirydd Cadw), Cyfarwyddwr yr ADChaTh a Phennaeth Cadw gwrdd ddwywaith y flwyddyn gyda'r Dirprwy Weinidog, yn debyg i'r broses a fabwysiadwyd gan gyrff hyd braich Llywodraeth Cymru. Dylent drafod ac adolygu blaenoriaethau Cadw, ochr yn ochr â'r cynllun busnes blynyddol y cytunwyd arno, a thynnu sylw at unrhyw bwyntiau a phryderon sydd gan y Bwrdd. Dylai'r broses hon gael ei chynnwys yn y *Ddogfen Framwaith Asiantaeth Fewnol Cadw* newydd.

5.5 Argymhelliad 5

Dylai Bwrdd Cadw gynnal Adolygiad/Ailddatganiad o Effeithiolrwydd Bwrdd Cadw yng ngoleuni'r adolygiad llywodraethu hwn. Dylai hyn gael ei arwain gan hwylusydd annibynnol i sicrhau bod sgiliau, profiadau, arferion a gweithdrefnau'r Bwrdd yn adlewyrchu'r gwaith sy'n ofynnol ohono, ac mae ei aelodaeth yn cynrychioli Cymru fodern ac amrywiol. Dylai Cyfarwyddwr yr ADChaTh arwain ar graffu ar y gwaith hwn a dylid adlewyrchu canlyniadau'r ymarfer hwn yn y *Ddogfen Framwaith Asiantaeth Fewnol Cadw*.

Dylid datblygu cynllun olyniaeth Bwrdd a dylai'r ymarfer hwn fod yn dreigl i ystyried unrhyw newidiadau annisgwyl i'r Bwrdd. Mae Saith Egwyddor Bywyd Cyhoeddus (a elwir hefyd yn Egwyddorion Nolan) wrth wraidd ymarfer y Bwrdd: anhunanoldeb, uniondeb, gwrthrychedd, atebolrwydd, didwylledd, gonestrwydd ac arweinyddiaeth.

5.6 Argymhelliad 6

Dylai Bwrdd Cadw enwebu un o'i aelodau i fod yn Uwch Is-gadeirydd Annibynnol fel gwarchodwr, a all, os oes angen, weithredu fel cyfle rhwng y Cadeirydd, y Bwrdd a'r Prif Weithredwr os bydd unrhyw bryderon anghyson ynghylch llywodraethu'r Bwrdd yn codi.

Yn ystod yr adolygiad hwn, ymddiswyddodd Cadeirydd Cadw, a oedd hefyd yn aelod o'r Tîm Cydlynu a'r GGG, i ymgymryd â phenodiad cyhoeddus newydd. Dylid ystyried penodi Cadeirydd Cadw newydd yng nghydestun argymhellion yr adolygiad.

Uchod: Ymwelydd ifanc yn gwneud y mwyaf o'r profiad Realiti Estynedig yng Nghastell Rhaglan, Sir Fynwy.

Gwaelod: Cyfres o adnoddau Cymraeg a gynhyrchwyd gan Cadw sy'n galluogi dysgwyr Cymraeg i ymarfer eu sgiliau yn safleoedd Cadw.

5.7 Argymhelliad 7

Dylid adolygu rôl Bwrdd Cadw ac o bosibl ei mireinio. Gallai Bwrdd Cadw, gyda'i arbenigedd a'i fewnwelediad, ymgymryd â rôl fwy strategol yn ogystal â chynghori, gan weithio gyda Chyfarwyddwr yr ADChaTh ac UDG Cadw i herio, craffu a chefnogi, yn gyfartal, pob agwedd ar strategaeth Cadw yng nghyd-destun y *Ddogfen Framwaith Asiantaeth Fewnol Cadw* ddiwygiedig arfaethedig.

Dylai'r rôl newydd a argymhellir ar gyfer y Bwrdd gynnwys:

- Cyfleoedd i'r Bwrdd wneud argymhellion i Weinidogion Cymru, mewn partneriaeth ag UDG Cadw.
- Helpu i lunio pob agwedd ar strategaeth Cadw, gan gynnwys rôl arweinyddiaeth strategol ehangach Cadw o fewn y sector amgylchedd hanesyddol, o fewn paramedrau y cytunwyd arnynt.
- Sicrhau bod Cyfarwyddwr yr ADChaTh a'r Dirprwy Weinidog yn cael eu hysbysu am yr holl faterion sy'n effeithio ar allu Cadw i gyflawni ei ddiben orau.



Mae gwisgoedd hanesyddol
dilys yn cael eu gwneud gan
wirfoddolwyr yn Nhŷ Tref
Plas Mawr yng Nghonwy.



Thema C — Canolbwyntio ar bobl ac addasu prosesau a gweithdrefnau Llywodraeth Cymru lle maent yn ymwneud â Cadw, yn enwedig o ran Adnoddau Dynol, caffael a recriwtio, hyrwyddo a chadw staff. Sicrhau bod y prosesau a'r gweithdrefnau yn briodol i'r gwaith, sgil y staff a'r materion a'r heriau penodol sy'n wynebu Cadw. Yn bwysicaf oll, sicrhau bod camau gweithredu yn cael eu cyflawni mewn modd amserol.

5.8 Argymhelliad 8

Dylai Bwrdd Cadw, Pennaeth Cadw ac UDG Cadw gyflwyno cais i Gyfarwyddwr Adnoddau Dynol Llywodraeth Cymru fod person AD strategol uwch yn cael ei secondio i'w cefnogi a'u cynghori ar y prosesau AD amrywiol a'r newidiadau gweithdrefnol cysylltiedig ag AD a staff cysylltiedig yr argymhellir eu bod yn galluogi sefydliad mwy deinamig, sy'n wynebu'r cyhoedd, yn fasnachol weithredol ac yn seiliedig ar sgiliau arbenigol i weithredu'n fwy effeithlon ac effeithiol.

5.9 Argymhelliad 9

Dylid cynnal asesiad o sut y gellid addasu prosesau recriwtio a hyrwyddo presennol Llywodraeth Cymru yn well i weddu i anghenion Cadw, gan roi cydnabyddiaeth briodol i egwyddorion cydraddoldeb a phroses deg. Mae'r trefniadau Adnoddau Dynol sydd ar waith ar hyn o bryd ar gyfer arolygiaethau Llywodraeth Cymru yn darparu templed profi y gellid ei addasu ar gyfer Cadw.

5.10 Argymhelliad 10

Yn benodol, dylid rhoi awdurdod dirprwyedig i Cadw recriwtio, penodi, hyrwyddo a chadw staff, o fewn cyllidebau y cytunwyd arnynt a phrotocolau Adnoddau Dynol. Mae gan staff Cadw setiau a chyfrifoldebau anarferol iawn yng nghyd-destun Llywodraeth Cymru, gan gynnwys eu cylch gwaith masnachol a chadwraeth a gwaith gweithredol amrywiol.

Mae'r materion sy'n ymwneud â recriwtio, hyrwyddo a chadw staff Cadw, yn ogystal â'r gallu i benodi yswiriant brys, yn gofyn am sylw arbennig. Dylid rhoi awdurdod dirprwyedig i Cadw logi yswiriant brys, o fewn cyllidebau y cytunwyd arnynt a phrotocolau Adnoddau Dynol.

5.11 Argymhelliad 11

Dylid ailsefydlu'r dirprwyaethau recriwtio y manylir arnynt yn y *Ddogfen Fframwaith Asiantaeth Fewnol Cadw, 2017* ar y cyd ag argymhelliad 2.

Cyferbyn: Mae staff Cadwraeth Cymru, tîm cadwraeth mewnlol Cadw, yn grefftwy'r technegol ymarferol ac yn cynnwys seiri dodrefn a seiri maen.

5.12 Argymhelliad 12

Dylai UDG Cadw, gydag AD a chyngor cyfreithiol arbenigol y Llywodraeth, archwilio model 'eithrio mewnlol' ar gyfer Cadwraeth Cymru. Tîm Eiddo mewn Gofal Cadw (y mae Cadwraeth Cymru yn rhan ohono) yw'r tîm cadwraeth mewnlol sy'n darparu gwasanaethau arbenigol i safonau union. Weithiau mae eu gwaith yn cael ei ategu gan gontractwyr treftadaeth allanol arbenigol.

Mae'r staff o fewn Cadwraeth yn grefftwy'r ymarferol, technegol nad oes ganddynt lawer iawn yn gyffredin â ffyrdd y gwasanaeth sifil ehangach o weithio. Mae'n ddigon posibl y bydd cyfle i Cadwraeth, gydag adnoddau priodol, ymgymryd â gwaith ar gyfer sefydliadau eraill, a allai gynhyrchu incwm ac, yn ei dro, annog recriwtio a chadw staff a galluogi gwaith cadwraeth critigol i gael ei gyflawni mewn modd amserolach. Gallai hyn hefyd helpu recriwtio prentisiaid a chefnogi'r agenda sgiliau treftadaeth.

Gellid ystyried y model 'eithrio mewnlol' ar gyfer agweddau eraill ar rolau gweithredol Cadw, megis ei weithgareddau masnachol, sy'n cynnwys gweinyddu arlwygo ac aelodaeth, a wneir ar hyn o bryd gan gontractwyr trydydd parti.





Ceidwad yn Llys a Chastell Tretŵr, Powys, yn dangos offer taith sain i ymwelydd.

Ddim yn gysylltiedig yn uniongyrchol â llywodraethiant

5.13 Argymhelliad 13

Dylai Pennaeth Cadw, UDG Cadw, Undeb Llafur Cadw a chynrychiolwyr staff, gyda chymorth arbenigedd Adnoddau Dynol, ddefnyddio'r cyfle y mae'r adolygiad hwn yn ei roi i sicrhau bod Cadw yn cael ei staffio'n briodol ar y lefelau a'r graddau priodol gyda'r sgiliau perthnasol i gyflawni ei genhadaeth a'i bwrpas. Dylid cynnal gwerthusiad o system/llwybrau graddio Llywodraeth Cymru o ran ei bod yn addas i anghenion Cadw. Dylid ystyried strwythur graddio pwrpasol sy'n adlewyrchu'r rolau gweithredol unigryw o fewn Cadw, fel ceidwaid a seiri maen, os yw rheolau'r gwasanaeth sifil yn caniatáu.

Dylai'r adolygiad hwn o staffio sicrhau bod gan holl wahanol ganghennau Cadw yr adnodd cytbwys priodol i allu cael amser i fod yn strategol, yn ogystal â gweithredol, yn enwedig ym meysydd amgylchedd hanesyddol Cadw. Dylai unrhyw newidiadau arfaethedig fynd at Fwrdd Cadw i gael her, craffu a chymorth, cyn cael eu cyflwyno'n fewnol i Gyfarwyddwr yr ADChATh i gael camau gweithredu y cytunwyd arnynt.

Argymhellir hefyd y dylid creu rôl Pennaeth Adnoddau Dynol / Partner Busnes AD a gydnabyddir yn benodol o fewn strwythur UDG Cadw o ystyried nifer y bobl mae Cadw yn eu cyflogi.

5.14 Argymhelliad 14

Dylai UDG Cadw archwilio, gyda chyrff treftadaeth Cymreig eraill o'r un anian, gyrff addysg bellach a'r sector preifat, y posibilrwydd o sefydlu 'Ysgol Dreftadaeth a Sgiliau Cadwraeth Cymru a Rhagoriaeth Crefft' mewn partneriaeth â sefydliad addysgol yng Nghymru, gyda'r gallu i ddyfarnu cymwysterau cydnabyddedig. Awgrymir canolbwyntio'n benodol ar ddefnyddio deunydd traddodiadol a charbon isel.

Gallai'r fenter arloesol hon greu'r genhedlaeth nesaf o grefftwyr treftadaeth arbenigol. Bydd angen rheoli'r agweddau niferus ac amrywiol o ran llywodraethu menter o'r fath yn ofalus.

5.15 Argymhelliad 15

Dylai UDG Cadw, gyda chyingor arbenigol ac mewn partneriaeth â'r sector treftadaeth ac addysg uwch ehangach, ddatblygu a gweithredu cynllun prentisiaethau effeithiol, wedi'i ariannu ac yn hyfyw, ond nid dim ond yn benodol, i seiri maen — ar y cyd ag argymhelliad 14.

O dan y model hwn, rhaid i rolau prentisiaid fod yn atodol (h.y. mwy na chyfrif pen craidd), yn amodol ar recriwtio agored, cystadleuol, wedi'u halinio â safonau cymhwyster prentisiaid ac wedi'u cynllunio i fodloni gofynion prinder sgiliau yn y sector.

5.16 Argymhelliad 16

Dylid symleiddio'r system fetio gyfredol ar gyfer gwirfoddolwyr i gynorthwyo recriwtio a chadw gwirfoddolwyr, gan gofio am y fframwaith rheoleiddio angenrheidiol sydd ei angen. Mae Cadw wedi cymryd camau breision wrth ddatblygu ei gynnig i wirfoddolwyr yn ystod y blynyddoedd diwethaf a dylid defnyddio adnoddau ychwanegol i ddatblygu a thyfu cynnig gwirfoddolwyr Cadw ar draws holl safleoedd Cadw gyda pherson priodol o fewn Cadw yn benodol gyfrifol am wirfoddolwyr.

Mae'r materion penodol yn ymwneud ag Adnoddau Dynol ar gyfer gwirfoddolwyr Cadw angen sylw ac thrafodaeth ofalus rhwng AD Llywodraeth Cymru a UDG Cadw. Mae gan y cyfle i ddatblygu perthynas newydd â gwirfoddolwyr ledled Cymru fanteision sylweddol i bawb. Dylid chwilio am brofiadau a dysgu gan sefydliadau eraill, megis Comisiwn Beddau Rhyfel y Gymanwlad sy'n rhedeg cynllun gwirfoddoli ar gyfer cynnal a chadw beddau rhyfel. Gallai'r berthynas â gwirfoddolwyr fod yn gymhleth yng nghyd-destun llywodraethu Cadw/Llywodraeth Cymru.



Cyferbyn: Gwirfoddolwr yn siarad ag ymwelydd yng Nghastell Coch, Caerdydd.

Thema D — Atgyfnerthu partneriaethau sy'n cefnogi rôl Cadw yn y sector a gwasanaethau treftadaeth ehangach trwy berthnasoddedd agosach â sefydliadau diwylliannol, creadigol, hanesyddol ac ymwelwyr ledled Cymru a'r DU.

5.17 Argymhelliad 17

Dylai Partneriaeth Cymru Hanesyddol — yn cynnwys Llyfrgell Genedlaethol Cymru, Comisiwn Brenhinol Henebion Cymru (CBHC), Amgueddfa Cymru a Cadw — gael ei hailsefydlu i annog cydweithio hyd yn oed yn agosach, rhannu gwybodaeth ac arbenigedd mewn meysydd o ddiddordeb cyffredin, ac i archwilio hyd yn oed mwy o synergeddau rhwng cyrff diwylliant a threftadaeth cenedlaethol a ariennir yng Nghymru.

Teimlir bod cyfleoedd pellach i'r sefydliadau cenedlaethol weithio'n agosach gyda'i gilydd a chydweithio ar lefel leol, yn enwedig lle mae ganddynt yr un diddordeb mewn ymgysylltu â lleoedd penodol ac annog cyfranogiad cymunedau lleol yn eu treftadaeth.

Mae'r GGG yn credu bod y cyfleoedd posibl o amgylch dull 'tîm' go iawn yn sylweddol a bod Cadw mewn sefyllfa dda i arwain yma. Dyma farn a rennir gan fwyafrif aelodau Partneriaeth Cymru Hanesyddol.

Argymhellir hefyd y dylid gwahodd Croeso Cymru i fynychu'r cyfarfod hwn. Teimlwyd hefyd y gallai defnyddio'r bartneriaeth hon i wella'r berthynas bresennol gyda Cymru Greadigol a Chyngor Celfyddydau Cymru fod â manteision i bawb dan sylw.

Cyfarwyddwr yr ADChaTh sydd yn y sefyllfa orau i gadeirio'r Bartneriaeth hon. Efallai y bydd priod Gadeiryddion y pedwar corff cenedlaethol yn dymuno cyfarfod yn rheolaidd i rannu eu profiadau ac adrodd yn ôl i'w byrddau a'u gweithrediaeth eu hunain.

5.18 Argymhelliad 18

Dylid cynnal adolygiad o'r berthynas rhwng Cadw a CBHC, os yw'n dderbyniol i bob parti, gan y ddau sefydliad sy'n gweithio gyda'i gilydd. Tua wyth i naw mlynedd yn ôl, archwiliodd y ddau sefydliad synergeddau posibl o weithio'n agosach. Ers hynny, fel y gwelir yn yr adolygiad hwn, mae'r cyd-destun strategol wedi newid a byddai'n amserol i'r ddau sefydliad archwilio opsiynau ar gyfer datblygu'r synergeddau posibl sy'n bodoli rhyngddynt wrth gyflawni eu cyfrifoldebau a'u rhwymedigaethau a rennir i warchod, cofnodi a gwella dealltwriaeth y cyhoedd o'r amgylchedd hanesyddol.

Uchod: Tŵr cloc coffa Scott, adeilad rhestredig ym Mharc y Rhath, Caerdydd.

5.19 Argymhelliad 19



Mae'r 22 Awdurdod Lleol yng Nghymru yn allweddol i reoli'r amgylchedd hanesyddol yn gynaliadwy. Mae gan Cadw berthynas uniongyrchol ac, mewn rhai achosion, agos gyda nhw. Dylid sefydlu proses strwythuredig newydd ar gyfer ymgysylltu'n rheolaidd â'r Awdurdodau, o bosibl drwy Gymdeithas Llywodraeth Leol Cymru (CLILC), mewn meysydd fel ymchwil, allgymorth ac addysg gyhoeddus. Gallai Cadw hefyd ailedrych ar ei bwerau dirprwy, yn enwedig

mewn meysydd fel caniatâd adeiladau rhestredig, a fydd yn rhesymoli adnoddau. Dylai perthynas newydd o'r fath ddod â manteision sylweddol i bawb.

Ddim yn gysylltiedig yn uniongyrchol â llywodraethiant

5.20 Argymhelliad 20

Dylai Partneriaeth Cymru Hanesyddol ddatblygu strategaeth dwristiaeth ddiwylliannol benodol ar gyfer Cymru ar y cyd. Dylid trafod ac archwilio'r argymhelliad hwn gyda Croeso Cymru ac asiantaethau a sefydliadau cysylltiedig eraill, gan gynnwys Cyngor Celfyddydau Cymru a Cymru Greadigol, i ystyried sut rydym yn croesawu mwy o ymwelwyr i Gymru sy'n cael eu denu atom gan ein cynigion diwylliannol niferus ac amrywiol.

Gallai a dylai strategaeth o'r fath groesawu llawer o sefydliadau diwylliannol eraill ledled Cymru. Er mwyn cymhell a gwobrwyo syniadau gwych sy'n sicrhau canlyniadau gwych, efallai y bydd yr ADChaTh am ystyried, pan fydd cyllid yn caniatáu, sefydlu cronfa twristiaeth ddiwylliannol benodol, gyda grantiau i'w dyfarnu i'r syniadau gorau sy'n sicrhau'r canlyniadau gorau i ymwelwyr.

Thema E — Gwella rhai o weithgareddau amrywiol Cadw i gynorthwyo ei bwrpas craidd, gan gynnwys adeiladu ar waith masnachol Cadw fel atyniad ymwelwyr sylweddol a menter fasnachol, a'i rôl fel ceidwad a hyrwyddwr treftadaeth hanesyddol Cymru.

5.21 Argymhelliad 21

Dylai UDG Cadw gynnal adolygiad o'r gwraidd i'r bôn cyflawn, sylfaenol a radical o'i holl weithgareddau masnachol, gan gynnwys ei sgiliau staff, lefelau adnoddau staff a'i berthynas â phartneriaid allanol, yng nghyd-destun yr argymhellion yn yr adolygiad llywodraethu hwn, a ddylai ganiatáu mwy o hyblygrwydd i Cadw.

Mae'n bwysig pwysleisio pwrpas Cadw, a amlinellir yn ei adroddiad blynyddol (Atodiad 6.2, tudalen 5). Nid yw Cadw yn bodoli i fod yn weithrediad masnachol ac felly mae'n rhaid i unrhyw weithgaredd masnachol wella a chefnogi ei ddiben craidd.

Dylai gweithgareddau masnachol Cadw gofleidio Cynllun Gweithredu Economaidd Llywodraeth Cymru, yn enwedig ei ffocws ar economi sylfaenol Cymru. Mae Cadw mewn sefyllfa dda i hyrwyddo a chefnogi cyrchu a gwerthu bwydydd a chynnyrch o Gymru, a phob math o gynnyrch o Gymru.

Yng ngoleuni'r rhyddid newydd posibl hwn, dylai Cadw adolygu a/neu ailddatgan ei strategaeth fasnachol tymor byr, canol a hirdymor i sicrhau bod ei botensial ar gyfer twf pellach ei fusnes ymwelwyr a'r holl ffrydiau incwm eraill yn cael ei ddatblygu'n llawn.

Dylid creu 'Pennaeth Profiad Ymwelwyr a Datblygu Busnes' o fewn strwythur UDG Cadw, a dylai'r person hwn arwain yr adolygiad masnachol. Dylid cydnabod bod gan y rôl hon statws cyfartal â phenaethiaid canghennau rheoleiddio a chadwraeth Cadw.

5.22 Argymhelliad 22

Dylid caniatáu mwy o ryddid a hyblygrwydd i UDG Cadw ym mhob agwedd ar weithgareddau'r wasg, cysylltiadau cyhoeddus, marchnata a gwefan Cadw. Mae'r berthynas rhwng Cadw a thimau Llywodraeth Cymru sy'n gyfrifol am y maes hwn yn gryf. Fodd bynnag, bydd yr argymhelliad hwn yn gwella gallu Cadw i hyrwyddo ei hun yn sylweddol mewn modd mwy uniongyrchol a deinamig. Dylid rhoi hyder ym marn UDG Cadw nad ydynt yn gwrth-ddweud polisiau sy'n gysylltiedig â Llywodraeth Cymru yn y parth cyhoeddus.

Dylid ystyried tîm Marchnata a Chyfathrebu Cadw estynedig, gan adrodd i Bennaeth Cadw ond parhau i weithio mewn partneriaeth â thimau perthnasol Llywodraeth Cymru.

Dylai UDG Cadw ddyfeisio strategaeth Marchnata a Chyfathrebu wedi'i theilwra ar gyfer y blynyddoedd nesaf sy'n cael ei hadolygu'n rheolaidd ac sy'n cyd-fynd â strategaethau Llywodraeth Cymru a sefydliadau perthnasol eraill Llywodraeth Cymru.

Isod: Man eistedd awyr agored y caffi yng Nghastell Harlech, Gwynedd, un o'r pum caffi yn henebion Cadw.



5.23 Argymhelliad 23

Dylai Bwrdd Cadw ac UDG Cadw ailedrych ar y manteision posibl o greu cerbyd elusennol annibynnol, hyd braich, a allai fod o fudd i Cadw drwy ei allu i wneud cais yn uniongyrchol am arian, grantiau, rhoddion cymynrodd ac ati na fydd yn bosibl i Cadw fel Asiantaeth Llywodraeth Fewnol efallai.

Ddim yn gysylltiedig yn uniongyrchol â llywodraethiant

5.24 Argymhelliad 24

Dylai Bwrdd ac UDG Cadw adolygu eu rhaglenni arolygu yn rheolaidd i ail-fynd i'r afael â blaenoriaethau. Mae Cadw wedi cyfrannu'n sylweddol at ein dealltwriaeth o sut mae archaeoleg ac adeiladau hanesyddol yn hollbwysig i hunaniaeth a diwylliant Cymru. Mae rhaglenni arolyg ysbrydoledig wedi bod yn greiddiol i'r ddealltwriaeth hon ac yn parhau i fod. Mae Cadw wedi cwblhau arolygon mawr o adeiladau hanesyddol a safleoedd archaeolegol, gan nodi'r rhai y mae angen eu gwarchod yn gyfreithiol.

Fodd bynnag, gall fod yn anodd i fesurau rheoli ac diogelu gadw i fyny â'r cynnydd mewn gwybodaeth, yn enwedig pan fo llawer o ofynion amrywiol ar yr adnoddau sydd ar gael. O ganlyniad, teimlwyd gan rai aelodau o'r GGG y gallai'r diffyg rhwng yr hyn sy'n hysbys a'r hyn sy'n cael ei reoli a'i ddiogelu'n weithredol gynyddu ac, yng Nghymru, mae'r bwlch hwn yn ehangu.

Dylai ein huchelgeisiau ar gyfer yr amgylchedd hanesyddol, rhai ohonynt wedi'u cynnwys yn y *Blaenoriaethau ar gyfer Amgylchedd Hanesyddol Cymru, 2018* (Atodiad 6.12), gael eu hymgorffori'n fwy diogel o fewn fframwaith *Deddf Llesiant Cenedlaethau'r Dyfodol (Cymru) 2015*. Dylid ystyried lleoedd arbennig a reolir ac a ddiogelir yn briodol fel rhywbeth i'w ddatlu, ei fwynhau a'i rannu.

Bydd nodi'r adnoddau (pobl ac arian) ar gyfer y gwaith hanfodol hwn yn her a dylid ystyried archwilio synergeddau gyda CBHC a argymhellir ym mharagraff 5.18 uchod yn y cyd-destun hwn.

Top: Roedd Eglwys Ein Harglwyddes, Seren y Môr, a Santes Gwenffrewi yn rhan o raglen arolyg rhestru eglwysi Catholig a gynhaliwyd yn y blynyddoedd diweddar.

Dde: Mae blwch ffôn AA 161, ar yr A40 rhwng Crucywel a Thretŵr, yn un o'r henebion mwyaf diweddar ac anarferol i gael ei restru gan Cadw.



5.25 Argymhelliad 25

Dylai Bwrdd Cadw enwebu o leiaf un o'i aelodau i fod yn hyrwyddwr Cydraddoldeb, Amrywiaeth a Chynhwysiant (EDI), gan weithio'n agos â Phennaeth Cadw. Dylai EDI fod yn eitem agenda sefydlog ar gyfer Bwrdd Cadw, yn enwedig mewn perthynas â Deddf Cydraddoldeb 2010 ac ymrwymiad i'r naw nodwedd warchoddedig.

Mae'r heriau sy'n wynebu Cadw wrth recriwtio gweithlu mwy amrywiol yn cael eu rhannu gan lawer yn y sector treftadaeth a'r mater hwn, ochr yn ochr â sut mae Cadw yn ymgysylltu â grwpiau amrywiol, ddylai fod yr eitem gyntaf ar gyfer trafodaeth EDI gan y Bwrdd. Dylai trafodaethau gael eu cefnogi gan AD Llywodraeth Cymru a'u llywio gan bobl sydd â phrofiad byw ar y materion hyn. Dylai'r Bwrdd wneud argymhellion penodol i'r Dirprwy Weinidog ar sut y bydd Cadw yn mynd i'r afael â'r pwyntiau hyn.

Dylai Cadw ddathlu ei ymrwymiad i amrywiaeth drwy ei brosesau teg. Dylai hyn gynnwys cydnabod bod asedau Cadw yn perthyn i bawb, gan gynnwys y cymunedau hynny sydd ar y cyrion.

5.26 Argymhelliad 26

Dylai UDG Cadw gwrdd â Chomisiynydd y Gymraeg, gyda chefnogaeth AD Llywodraeth Cymru, yng nghyd-destun ein diffiniad o lywodraethu, i adolygu a mireinio cynllun gweithredu Cadw ar recriwtio mwy o staff sy'n siarad Cymraeg, yn enwedig staff sy'n wynebu'r cyhoedd.

Dylai trafodaethau fod yn seiliedig ar ddealltwriaeth gefnogol o'r heriau y mae Cadw wedi'u hwynebu — ac a wynebwr gan y sector yn gyffredinol yn y maes hwn — a'r gwaith mae Cadw eisoes yn ei wneud.

5.27 Argymhelliad 27

Dylai UDG Cadw ddatblygu a gwella ei pherthynas bresennol â Chomisiynydd Cenedlaethau'r Dyfodol Cymru gyda chyfarfodydd rheolaidd i sicrhau nid yn unig bod Cadw yn cyflawni ei gyfrifoldebau o dan Ddeddf Llesiant Cenedlaethau'r Dyfodol (Cymru) 2015, ond i edrych yn gadarnhaol ar beth arall y gall Cadw ei wneud i gyflawni hyd yn oed mwy ar nodau'r Ddeddf ar gyfer pobl Cymru.

Bydd Bwrdd Cadw yn craffu ac yn cefnogi'r gwaith strategol hwn. Mae'r cyfleoedd yn sylweddol, megis cefnogi 'Cymru Iachach' drwy nodi rhai safleoedd Cadw a all greu mannau ac amgylcheddau iechyd a lles.

Mae UDG Cadw yn dymuno mabwysiadu dull tebyg o ymdrin â'r Comisiynydd Plant a Chomisiynydd Pobl Hŷn Cymru.

Ddim yn gysylltiedig yn uniongyrchol â llywodraethiant

5.28 Argymhelliad 28

Dylai Bwrdd Cadw a UDG Cadw weithio gyda phartneriaid allanol a chynghorwyr arbenigol sydd â phrofiad byw o anabledd, yng nghyd-destun diffiniad yr adolygiad o lywodraethu, i ddeall ac i fynd i'r afael â'r materion sy'n ymwneud â'u profiadau o sut y maent yn ymwneud â Cadw.

Mae'n debyg y bydd y gwaith hwn yn cynnwys archwiliad ac adolygiad o fynediad anabledd i safleoedd Cadw, gan gynnwys dealltwriaeth y staff o ofynion anabledd, ac ymgysylltu â nhw. Dylid nodi hyrwyddwr anabledd ar gyfer Bwrdd Cadw i adolygu'r recriwtio o staff a gwirfoddolwyr anabl, dan arweiniad ymwybyddiaeth o'r Model Cymdeithasol o Anabledd a'r holl ofynion cyfreithiol perthnasol, yn benodol ar ddarparu gwasanaethau a chyflogaeth.

Cydnabyddir bod Cadw yn ymwybodol o'r mater hwn ac wedi ymgymryd â rhai mentrau, ond mae pob un yn cydnabod bod angen gwneud mwy o hyd. Dylai allbwn y gwaith hwn gyfrannu at Gynllun Datblygu'r Gynulleidfa y mae Cadw yn ei baratoi, yn seiliedig ar strategaethau sy'n defnyddio dulliau eang i ymgysylltu ag ymwelwyr amrywiol yn gorfforol ac o bell. Mae'r defnydd cynhwysol o iaith a chyfathrebu yn hollbwysig yn hyn o beth, gan gynnwys iaith Arwyddion Prydain ac egwyddorion Hawdd eu Deall lle bo hynny'n bosibl.

5.29 Argymhelliad 29

Dylai aelodaeth gyhoeddus Cadw o bron i 60,000 ac sy'n tyfu (i bob pwrpas, llais cefnogwyr brwd Cadw) barhau i gael eu harchwilio gan UDG Cadw i ddeall sut y gellir datblygu'r berthynas unigryw hon a'i gwella ymhellach.

Dylai manteision y berthynas hon nid yn unig barhau i helpu i lywio profiad ymwelwyr Cadw ond hefyd ddarparu seinfwrdd i Cadw ac i Weinidogion Cymru mewn sawl agwedd ar waith y sectorau amgylchedd hanesyddol a diwylliannol ehangach. Gall safbwyntiau a mewnwediadau aelodau Cadw arwain at drafodaethau llywodraethu posibl ar sut mae Cadw yn ymgysylltu â'r cyhoedd yn ehangach.



Teulu yn crwydro Llys yr
Esgob Tyddewi, Sir Benfro.

Atodiadau 1–14

6.1 Atodiad 1 — Data sefydliadol Cadw ar yr adeg y sefydlwyd y model llywodraethu presennol yn 2017 o'i gymharu â'r ffigurau diweddaraf ar gyfer 2022–23.

Gweithgaredd	2016–17	2022–23
Nifer y swyddi	249	252
Cyfanswm incwm refeniw, sef yr hyn yw'r incwm masnachol	£14.3m £6.7m	£18.1m £9.6m
% o'r incwm refeniw a gynhyrchir gan Cadw	47%	53%
Cyllideb gyfalaf	£3.26m	£10m
Ymwelwyr blynyddol i safleoedd â staff	c. 1.4m	1.14m
Nifer aelodau Cadw	18,500	53,000
Nifer yr eiddo	129 (29 â staff)	131
Nifer y crefftwyr cadwraeth arbenigol a gyfflogir	32	23
Ymgynghoriadau ar geisiadau cynllunio	622	1,618
Ymgynghoriadau ar geisiadau caniatâd i adeilad rhestredig	529	388
Ceisiadau caniatâd i heneb gofrestrdedig	94	147
Ymgynghoriadau eraill	170	409
Nifer yr adeiladau rhestredig	29,935	30,064
Nifer yr henebion cofrestrdedig	4,182	4,227

6.2 Atodiad 2 — [Adroddiad Blynyddol Cadw 2022–23](#)

6.3 Atodiad 3 — [Datganiad Dirprwy Weinidog y Celfyddydau, Chwaraeon a Thwristiaeth: Adolygiad Llywodraeth Cymru o Cadw i'w arwain gan Roger Lewis](#)

6.4 Atodiad 4 — [Datganiad Ysgrifenedig Dirprwy Weinidog y Celfyddydau, Chwaraeon a Thwristiaeth: Diweddariad ar yr adolygiad o lywodraethiant Cadw](#)

Tîm Cydlyn

6.5.1 Roger Lewis (Cadeirydd)

Mae Roger Lewis wedi cadeirio amrywiaeth o sefydliadau, gan gynnwys Prifddinas-Ranbarth Caerdydd, Maes Awyr Caerdydd, Ymgyrch Refferendwm 'Ie i Gymru', Cynllun Ysgolion Cerddoriaeth a Dawns Llywodraeth y DU, Grŵp Cyfryngau Cae Ras, a Cherddorfa Ffilharmonig Frenhinol Lerpwl. Roedd hefyd yn aelod o Grŵp Swyddfa Cabinet Llywodraeth y DU i gynghori ar Anrhydeddau Dinesig y Jiwbil Platinwm, Aelod Bwrdd Cymru ar gyfer Festival UK 2022, a Llywydd Amgueddfa Genedlaethol Cymru. Mae wedi dal swyddi uwch gweithredol yn y BBC, ITV, EMI, Decca, Classic FM ac URC. Mae gan Roger Lewis ddoethuriaethau anrhydeddus gan Brifysgolion Nottingham a De Cymru, Cymrodoriaethau o Brifysgol Caerdydd a Choleg Brenhinol Cerdd a Drama Cymru, mae'n Aelod Anrhydeddus o'r Coleg Cerdd Brenhinol ac yn Gymrawd o Gymdeithas Frenhinol y Celfyddydau.

6.5.2 Jane Richardson

Jane yw Cadeirydd Bwrdd Cadw ac mae'n rhedeg ei hymgyngoriaeth ei hun gan ddarparu gwasanaethau strategol i'r sector diwylliant a threftadaeth. Mae hi'n mwynhau helpu sefydliadau i wella eu perfformiad ac archwilio cyfleoedd newydd. Tan ddechrau 2023, roedd hi'n Gyfarwyddwr Strategol dros yr Economi a Lle gyda Chyngor Bwrdeistref Sirol Conwy, lle'r oedd ganddi gyfrifoldeb am wasanaethau yn amrywio o'r amgylchedd a thai i ddatblygiad economaidd a hamdden. Arweiniodd nifer o brosiectau seilwaith proffil uchel yn y sir gan gynnwys creu'r Ganolfan Ddiwylliant newydd yng Nghonwy a thrawsnewid glannau'r dŵr ym Mae Colwyn. Roedd Jane yn ymwneud yn agos â sicrhau Bargen Twf gwerth £240m ar gyfer gogledd Cymru a chadeiriodd y Bwrdd Portffolio sy'n goruchwyllo'r gwaith o'i weithredu.

Cyn ymuno â'r cyngor, roedd Jane yn Gyfarwyddwr yn Croeso Cymru, gan arwain ar bob datblygiad cynnyrch twristiaeth ledled Cymru gan gynnwys buddsoddiadau mawr mewn atyniadau newydd fel Zipworld a'r Bathdy Brenhinol. Treuliodd 10 mlynedd yn gweithio gyda'r Ymddiriedolaeth Genedlaethol mewn amrywiaeth o rolau. Roedd hi'n rhan o dîm bach wnaeth drosi diffyg gweithredol blynyddol gwerth £2.6m yr Ymddiriedolaeth yng Nghymru o fewn dwy flynedd. Mae hi wedi rheoli atyniadau ymwelwyr, gan gynnwys Plas Newydd ar Ynys Môn lle cynyddodd nifer yr ymwelwyr o dros 50% a chyflwyno elw gweithredol cyntaf yr eiddo yn ei hanes 30 mlynedd. Dechreuodd ei gyrfa ym maes darlledu ac ac mae dal ganddi ddiddordeb arbennig mewn marchnata a chyfathrebu.

6.5.3 Dr Emma Plunkett-Dillon

Cyfarwyddwr Cynorthwyol Ymddiriedolaeth Genedlaethol Cymru (Ymgynghoriaeth) nes ymddeol yn 2019. Roedd gan Emma gyfrifoldeb am dîm eang o weithwyr cadwraeth proffesiynol yn amrywio ar draws tir, adeiladau, ynni, archaeoleg a chadwraeth natur. Arweiniodd nifer o brosiectau ar raddfa tirwedd gan gynnwys adfer Dalgylch Uwch Conwy a chyflawni prosiect ynni adnewyddadwy uchelgeisiol yr Ymddiriedolaeth. Roedd ei chyfrifoldebau'n cynnwys polisi amgylcheddol allanol, naturiol a hanesyddol. Cynrychiolodd yr Ymddiriedolaeth ar sawl un o fyrddau Llywodraeth Cymru, gan gynnwys y Grŵp Amgylchedd Hanesyddol. Y tu hwnt i Gymru, arweiniodd banel addasu arfordirol yr Ymddiriedolaeth, ac roedd yn rhan o'r tîm a ehangodd y rhaglen ynni adnewyddadwy a chyfrannu at fentrau Ffermio ar gyfer Natur. Fel Cyfarwyddwr Cynorthwyol, sefydlodd ymgynghoriaeth fewnol a chefnogodd y Cyfarwyddwr gydag ailstrwythuro ledled Cymru.

Cyn hyn, roedd hi'n uwch archeolegydd yn gweithio i'r Ymddiriedolaeth Genedlaethol, yn rheolwr llinell i archeolegwyr yng nghanolbarth a de-orllewin Lloegr yn ogystal â Chymru.

Mae ei phrofiad ehangach yn cynnwys cadeirio Cyngor Archaeoleg Prydain Cymru, Ymddiriedolwr Cyngor Archaeoleg Prydain (DU), aelod o bwyllgor rheoli Cyswllt Amgylchedd Cymru, ac aelodaeth o Fwrdd Henebion Cymru. Ar hyn o bryd, mae Emma yn Ymddiriedolwr ac yn Is-gadeirydd Ymddiriedolaeth Archeolegol Dyfed.

Isod: Ymwelydd a'i gydymaith yn Llys yr Esgob Tyddewi, Sir Benfro.



Aelodau'r Grŵp Gorchwyl a Gorffen

6.5.4 Martin Cherry

Dysgodd Martin Cherry hanes mewn gwahanol brifysgolion cyn symud i faes polisi cadwraeth adeiladau hanesyddol. Bu'n Bennaeth Rhestru a Chyfarwyddwr Ymchwil English Heritage tan 2005. Gweithiodd fel ymgynghorydd arbenigol i Gyngor Ewrop am dros ddeng mlynedd a bu'n un o'r aelodau rhyngwladol i'r Comisiwn i Warchod Henebion Cenedlaethol yn Bosnia a Herzegovina tan 2016. Mae wedi cyhoeddi ym meysydd astudiaethau canoloesol, pensaernïaeth Fictoriaidd, adeiladau traddodiadol a pholisi cadwraeth. Bu'n Llywydd y Grŵp Pensaernïaeth Frodorol rhwng 2014 a 2017. Mae'n ymddiriedolwr 'Darganfod Hen Dai Cymreig' ac 'Adeiladau a Llefydd Hanesyddol' (yr AMS gynt) ac mae'n Gymrawd o Gymdeithas Hynafiaethau Llundain.

6.5.5 Henry Owen-John

Mae Henry Owen-John yn gweithio'n rhan-amser fel cynghorydd rheoli treftadaeth annibynnol. Dechreuodd ymddiddori mewn archaeoleg yn ei arddedau ac yn Ymddiriedolaeth Archeolegol Morgannwg-Gwent fe helpodd i ddatblygu gwasanaethau cynghori i awdurdodau cynllunio lleol, yn ogystal â chyflawni prosiectau maes. Gweithiodd mewn gwahanol alluoedd ar gyfer yr hyn sydd bellach yn Historic England, gan gynnwys Cyfarwyddwr Rhanbarthol y gogledd-orllewin a Phennaeth Treftadaeth y Byd, gan roi cyngor i Lywodraeth y DU. Gwasanaethodd Henry ar Gomisiwn Brenhinol Henebion Cymru a dyfarnwyd OBE iddo am wasanaethau i ddiogelu treftadaeth yn 2020.

6.5.6 Nicola Andrews

Nicola yw Cyfarwyddwr Palasau Historic Royal Palaces, gyda chyfrifoldeb am Balas Hampton Court, Palas Kensington, Castell a Gerddi Hillsborough, The Banqueting House a Phalas Kew (gan gynnwys Bwthyn y Frenhines Charlotte, y Ceginau Brenhinol a'r Pagoda Mawr – oll o fewn tiroedd y Gerddi Botaneg Brenhinol, Kew). Mae'n gyfrifol am weithrediadau ar draws yr holl safleoedd hyn, yn ogystal â rheoli a chynnal a chadw'r palasau a'u tiroedd a'u hystadau, a'r digwyddiadau a gynhelir yno. Mae hi hefyd yn gyfrifol am sicrhau bod cynllun integredig ar gyfer pob palas sy'n dangos sut y bydd pob un yn cyfrannu at strategaeth HRP.

Ymunodd Nicola â Historic Royal Palaces yn 2018 ar ôl 23 mlynedd o brofiad yn yr Ymddiriedolaeth Genedlaethol. Gweithiodd mewn ystod eang o adrannau dros y cyfnod hwnnw, gan gynnwys gweithrediadau, materion allanol, cadwraeth, AD a chyllid.

Yn fwyaf diweddar, bu'n Gyfarwyddwr Gweithrediadau Canolog ac Ymgynghori, gyda chyfrifoldeb am arwain strategaeth yr Ymddiriedolaeth drwy dimau gweithredol ac ymgynghori ar draws y sefydliad; datblygu strategaeth twf ymwelwyr y sefydliad; ac ar gyfer risg weithredol a chydymffurfiaeth. Bu Nicola hefyd yn arwain y prosesau cynllunio corfforaethol, rheoli perfformiad, a phrosiectau a chaffael, i gefnogi'r tîm Gweithredol a Bwrdd yr Ymddiriedolwyr.

6.5.7 Roger Thomas OBE

Roger Thomas OBE yw cyn-uwch bartner Eversheds yn ne Cymru. Yn ogystal â'i yrfa gyfreithiol, mae Roger hefyd wedi dal swyddi Cadeirydd gyda CCAUC, Prifysgol Morgannwg, lle'r oedd hefyd yn ddirprwy-ganghellor, WNO, Cadeiryddion Addysg Uwch Cymru, ac roedd yn aelod o Bwyllgor Cadeiryddion y Brifysgol, a Llys a Chyngor ac Is-lywydd Amgueddfa Genedlaethol Cymru. Mae Roger hefyd wedi bod yn aelod o Adolygiad Llywodraeth Cynulliad Cymru o Addysg Uwch yng Nghymru, cynghorydd partneriaeth fusnes ar gyfer Cynulliad Cenedlaethol Cymru, is-gadeirydd yr asiantaeth fenter, Busnes mewn Ffocws ac is-gadeirydd Techniquet, yr elusen addysgol. Mae'n Feddyg Anrhydeddus o Brifysgol Morgannwg ac yn Swyddog Urdd Sant Ioan. Roger yw Cadeirydd Cyswllt Pentir Penarth ar hyn o bryd.

6.5.8 Sarah Dickins

Am ddeng mlynedd ar hugain, adroddodd Sarah ar ran y BBC ar economi'r DU a chyflwynodd ystod eang o raglenni radio a theledu byw. Dadansoddodd y symudiad o ddibyniaeth ar garbon a thanwydd ffosil i ddatgarboneiddio a'r ymgyrch am fwy o gynaliadwyedd.

Am y deng mlynedd diwethaf, Sarah fu'n Ohebydd Economeg Cymru. Cyn hynny, hi oedd Gohebydd Busnes BBC 1 a BBC 2 a Chyflwynydd Working Lunch, rhaglen fusnes ddyddiol BBC 2. Ar ôl hynny, treuliodd chwe blynedd fel Gohebydd Diwydiannol i BBC Cymru a hi oedd y fenyw gyntaf i fod yn ohebydd diwydiannol ar y teledu yn y DU.

Mae Sarah wedi cyfweld â phenaethiaid y wladwriaeth a gweinidogion y llywodraeth, o Margaret Thatcher a Tony Blair i David Cameron a Michael Gove. Mae hi wedi darlledu'n fyw ar BBC 1, BBC 2 a BBC World o Fforwm Economaidd y Byd yn Davos yn ogystal â chynadleddau pleidiau gwleidyddol, CBI, a Chyngres yr Undebau Llafur.

Mae hi hefyd wedi cynnal a chadeirio nifer o ddigwyddiadau ac mae hi bellach wedi gadael y BBC i ddefnyddio ei sgiliau a'i phrofiad i helpu cwmnïau i oresgyn rhwystrau i'w targedau Sero Net eu hunain a dod yn fwy cynaliadwy.

6.5.9 Steven Foulston

Mae Steven Foulston yn gweithio mewn rôl Adnoddau Dynol uwch yn y Tŷ Opera Brenhinol, Covent Garden. Cyn hynny, bu'n gweithio mewn amryw o swyddi Adnoddau Dynol mewn nifer o safleoedd gwaith dur ledled de Cymru. Gyda gradd mewn hanes, mae gan Steven ddiddordeb arbennig yn y cyfnodau Rhufeinig a chanoloesol. Mae Steven yn rhannu ei amser rhwng Llundain a'i gartref yng Nghaerllion.

6.5.10 Ruth Fabby MBE, DL, FRSA, CF

Mae Ruth yn cael ei hystyried yn arweinydd, yn arloeswr yn ei maes, ac yn angerddol am rymuso artistiaid anabl, herio agweddau cymdeithasol a gwrthio ffiniau yn y sîn celfyddydau anabledd drwy ei gwaith fel Cyfarwyddwr Creadigol gyda DaDaFest a Celfyddydau Anabledd Cymru. Mae Ruth hefyd ar Fyrddau DisArt [Michigan, UDA], Unlimited Commissions, ac yn aelod o Gyngor Celfyddydau Cymru. Cafodd Ruth ei chyhoeddi hefyd fel un o 100 Gwneuthurwr Newid Deddf Llesiant Cenedlaethau'r Dyfodol ym mis Ionawr 2023.

6.5.11 Cadw Staff Representative

Tracy Dicaldo – Rheolwr Iechyd, Diogelwch a Lles Cadw a chynrychiolydd staff Bwrdd Cadw.

6.5.12 Cynrychiolwyr Undebau Llafur

Mae cynrychiolwyr wedi'u henwebu o'r undebau PCS, Prospect a'r FDA a byddant yn chwarae rhan weithredol yn yr adolygiad.



Top: Llys a Chastell Tretŵr, Powys.

Uchod: Teulu ym Maddonau Rhufeinig Caerllion, Casnewydd.

6.6.1

Llywodraethiant yw'r system o reolau, arferion a phrosesau y mae Cadw yn cael ei gyfarwyddo a'i reoli fel Asiantaeth Fewnol Llywodraeth Cymru.

6.6.2

Mae llywodraethiant yn cyfeirio at y ffordd y mae Cadw yn cael ei lywodraethu ac at ba ddiben.

6.6.3

Mae llywodraethiant yn nodi pwy sydd â phŵer ac atebolrwydd, a phwy sy'n gwneud penderfyniadau ynghylch gwaith Cadw. Yn ei hanfod, mae'n becyn cymorth sy'n galluogi tîm rheoli Cadw a Bwrdd Cadw i ddelio yn fwy effeithiol â'r heriau o redeg Cadw.

6.6.4

Mae llywodraethiant yn sicrhau bod gan Cadw brosesau a rheolaethau gwneud penderfyniadau priodol ar waith fel bod buddiannau pob rhanddeiliad (cyflogeion, cymuned, aelodau Cadw, cyflenwyr Cadw, cwsmeriaid Cadw, perchnogion asedau hanesyddol dynodedig a Llywodraeth Cymru) yn gytbwys.

6.6.5

Mae llywodraethiant yn cynnwys y prosesau y mae amcanion Cadw yn cael eu gosod a'u dilyn trwyddynt yng nghyd-destun yr amgylcheddau cymdeithasol, diwylliannol, rheoleiddiol, gwleidyddol a pholisi a ffisegol a marchnad.

6.6.6

Mae llywodraethiant yn ymwneud ag arferion a gweithdrefnau ar gyfer ceisio sicrhau bod Cadw yn cael ei redeg yn y fath fodd fel ei fod yn cyflawni ei amcanion ac yn cyflawni ei ddiben wrth sicrhau bod yr holl rhanddeiliaid yn gallu bod yn hyderus bod sylfaen dda i'w hymddiriedaeth yn Cadw.

6.6.7

Mae llywodraethiant da yn bwysig gan ei fod yn darparu'r seilwaith i wella ansawdd y penderfyniadau a wneir gan y rhai sy'n rheoli Cadw.

6.6.8

Mae gwneud penderfyniadau moesegol o ansawdd da yn adeiladu cynaliadwyedd ac yn galluogi Cadw i gyflawni ei bwrpas ar gyfer cenedlaethau'r dyfodol mor effeithiol â phosibl.

Isod: Gardd Dân Abaty Tyndyrn, Sir Fynwy, oedd un o'r nifer o ddigwyddiadau a oedd yn rhan o raglen ddigwyddiadau flynyddol Cadw.



6.7 Atodiad 7 — Yr egwyddorion sy'n llywio ein hymagwedd a'n dull tuag at Adolygiad 2023. Nodyn y Cadeirydd i'r GGG, 25 Ebrill 2023.

6.7.1

Canolbwyntio ar y Briff Adolygiad ac felly osgoi ymgripiad cenhadaeth.

6.7.2

Yn ddefnyddiol i'r Dirprwy Weinidog a'r Adran Diwylliant, Chwaraeon a Thwristiaeth, staff Cadw, ac yn y pen draw i helpu i gyflawni pwrpas Cadw mor effeithiol â phosibl er budd cenedlaethau'r presennol a'r dyfodol.

6.7.3

Wedi'i lywio gan arbenigedd perthnasol, o fewn Cadw, ac yng Nghymru a thu hwnt.

6.7.4

Cymesur. Ni ddylai'r adroddiad fod yn rhy fiwrocraidd a bod yn briodol i'r rhan unigryw a llwyddiannus y mae Cadw yn ei chwarae yng Nghymru a'i safle o fewn Llywodraeth Cymru a chydnabod bod o leiaf chwe adolygiad o wahanol agweddau ar Cadw wedi digwydd dros yr 20 mlynedd diwethaf. Mae llawer o waith da eisoes wedi'i wneud ac mae angen i ni nodi unrhyw heriau llywodraethu a chyfluoedd sylweddol i Cadw fynd i'r afael â nhw.

6.7.5

Yn adeiladol feirniadol, trylwyr, agored a chefnogol. Os yw'r adolygiad yn nodi'r angen am newid, anogwch argymhellion sy'n drawsnewidiol a beiddgar lle mae angen iddynt fod, ond sy'n cydnabod y gallai'r rhain fod yn ddibynnol ar waith a dadansoddiad pellach.

6.7.6

Realistig. Gan ganolbwyntio ar faterion y gall Llywodraeth Cymru a Cadw eu rheoli neu addasu a'u cywiro ynghylch Llywodraethu Cadw, yn hytrach na rhoi sylwadau ar faterion ehangach sy'n cyd-fynd â'n llinell amser.

6.7.7

Cynhwysol. Cynnwys holl staff a Bwrdd Cadw a, lle bo'n briodol, staff Llywodraeth Cymru, y cyhoedd, partneriaid a rhanddeiliaid.

6.7.8

Tryloyw. Sicrhau atebolrwydd clir a bod yn agored ym mhob agwedd ar y broses adolygu.

6.7.9

Cyflwyno argymhellion pendant sy'n rhoi sicrwydd i weinidogion, y cyhoedd, staff Cadw a holl rhanddeiliaid Cadw, mai Cadw sydd yn y sefyllfa orau i gyflawni ei bwrpas.

6.7.10

Alinio lle bynnag y bo'n bosibl â Rhaglen Lywodraethu Llywodraeth Cymru.

6.7.11

Cydnabod a dathlu llwyddiannau eithriadol Cadw, yn enwedig yn ystod y pandemig, ac ers ei adolygiad diwethaf yn 2017.

Isod: Gweithiodd Tim Deddfwriaeth a Pholisi Cadw ar gydgrynhoi'r ddeddfwriaeth a arweiniodd at Ddeddf yr Amgylchedd Hanesyddol (Cymru) 2023.



6.6 Atodiad 8 — Prif Amcanion Grŵp Gorchwyl a Gorffen 2023. Nodyn y Cadeiryddi 'r GGG, 25 Ebrill 2023.

6.8.1

Asesu gweithredu, effeithiolrwydd a llwyddiant model gweithredu yr Asiantaeth Fewnol ar gyfer Cadw a'r rhyddid gweithredol yn dilyn adolygiad 2017.

6.8.2

Ystyried a yw'r trefniadau newydd hyn wedi gwella'r ddarpariaeth ehangach o wasanaethau treftadaeth gyhoeddus ar lefel genedlaethol ledled Cymru, ac ystyried opsiynau ar gyfer sut y gellid cryfhau'r rhain.

6.8.3

Asesu a yw'r trefniadau presennol yn darparu'r model mwyaf effeithiol ar gyfer cyflawni amcanion Llywodraeth Cymru ar gyfer Cadw o ran cynyddu nifer yr ymwelwyr, cynyddu aelodaeth, cynyddu incwm masnachol, ehangu mynediad, a chyrraedd cynulleidfaoedd newydd.

6.8.4

Asesu a yw'r trefniadau presennol yn cefnogi cenhadaeth cadwraeth Cadw wrth ofalu am safleoedd Cymru o arwyddocâd treftadaeth sylweddol.

6.8.5

Asesu a yw'r trefniadau presennol yn cefnogi swyddogaethau polisi, deddfwriaethol a rheoleiddiol Cadw o fewn amgylchedd hanesyddol Cymru.

6.8.6

Rhoi argymhellion i Weinidogion ynghylch y trefniadau gweithredol presennol a pha welliannau, os o gwbl, y gellid eu rhoi ar waith.

6.8.7

Gwneud argymhellion (os yw'n briodol) ar unrhyw ddadansoddiad neu waith pellach y gallai fod ei angen.

6.9 Atodiad 9 — Adolygiad treftadaeth (Cymru Hanesyddol): astudiaeth ddichonoldeb ar gyfer hunaniaeth sengl — [Cymru Hanesyddol: Ar drywydd Llwyddiant, Cadernid a Chynaliadwyedd ar gyfer Treftadaeth Cymru](#), Chwefror 2017.

6.10 Atodiad 10 — [Ffrwd Waith Cymru Hanesyddol — Cadw: Achos Busnes dros Newid](#), Hydref 2017.

Isod: Disgyblion Ysgol Uwchradd Dŵr y Felin yn cymryd rhan mewn cynllun Ceidwaid Ifanc a oedd yn eu hannog i wneud defnydd o Abaty Nedd fel maes dysgu.





6.11 Atodiad 11 — Rhestr o ymgynghorwyr, 2023

Ymgynghorai	Rôl
Cadw	
Jason Thomas	Cyfarwyddwr yr Adran Diwylliant, Chwaraeon a Thwristiaeth
Gwilym Hughes	Dirprwy Gyfarwyddwr — Cadw / Pennaeth Cadw
Stephanie Evans	Pennaeth Adeiladau mewn Gofal
Kate Roberts	Pennaeth Cangen yr Amgylchedd Hanesyddol
Huw Davies	Pennaeth Cyllid a Gwasanaethau Canolog
Gwydion Griffiths	Pennaeth Marchnata a Datblygu Busnes
Huw Gwillim	Pennaeth Ymgysylltu â'r Cyhoedd a Gwasanaethau Ymwelwyr
Chris Wilson	Pennaeth Cadwraeth, Eiddo mewn Gofal
Judith Alfrey	Pennaeth Adfywio Trefnadaeth a Chadwraeth
Zara Cottle	Uwch Reolwr Masnachol
David Manners	Uwch Reolwr Gwasanaethau Ymwelwyr
Angharad Howell	Rheolwr Castell — Castell Caerffili a Chastell Coch
Sheena Williams	Ceidwad Arweiniol — Plas Mawr
Tracy Dicataldo	Cynrychiolydd Staff Cadw
All staff	Arolwg yr holl staff anhysbys — 88 o ymatebion
Bwrdd Cadw	
Jane Richardson	Cadeirydd, Bwrdd Cadw
Liz Girling	Aelod Anweithredol
Peter Wakelin	Aelod Anweithredol
Gaynor Legall	Aelod Anweithredol
Steven Foulston	Aelod Anweithredol
Llywodraeth Cymru	
Tim Moss	Cyfarwyddwr Cyffredinol/Prif Weithredwr
Peter Kennedy	Cyfarwyddwr AD — Pobl a Lleoedd
Dean Medcraft	Cyfarwyddwr — Cyllid a Gweithrediadau, Economi, Trysorlys a Chyfansoddiad
David Cullis	Rheolwr Cyfleusterau Rhanbarthol — Ystâd Llywodraeth Cymru
Helen Scaife	Rheolwr Cyfleusterau Bedwas

Cynrychiolwyr Undebau Llafur

David Edwards	Cynrychiolydd Undeb PCS
Haydn Bradley-Davies	Cynrychiolydd Undeb Prospect
Marie Knox	Cynrychiolydd undeb yr FDA

Ymgynghoreion allanol

Duncan Wilson	Prif Weithredwr, Historic England
Donella Steel	Cyfarwyddwr Cyllid a Gwasanaethau Corfforaethol, Historic Environment Scotland
Pedr ap Ilywd	Prif Weithredwr a Llyfrgellydd, Llyfrgell Genedlaethol Cymru
Christopher Catling	Ysgrifennydd / Prif Weithredwr, CBHC / RCAHMMW
Caroline Crewe-Reed	Comisiynydd, CBHC / CBAHMMW
Nancy Edwards	Cadeirydd, CBHC / CBAHMMW
Mathew Talfan	Pennaeth Strategaeth a Gweithrediadau, Severn Screen / Ymgynghorydd Marchnata
Paul Belford	Prif Weithredwr Ymddiriedolaeth Archeolegol Clwyd-Powys
Andrew Davidson	Prif Weithredwr Ymddiriedolaeth Archeolegol Gwynedd
Andy Marvell	Prif Weithredwr Ymddiriedolaeth Archeolegol Morgannwg-Gwent
Ken Murphy	Prif Weithredwr Ymddiriedolaeth Archeolegol Dyfed
Kate Gardner	Rheolwr Ymgynghoriaeth Ymddiriedolaeth Genedlaethol Cymru
Paul Southall	Rheolwr Ymgynghoriaeth Ymddiriedolaeth Genedlaethol Cymru
Sam Johnson	Swyddog Cadwraeth Treftadaeth Adeiledig, Cyngor Sir Powys
Eleanor Carpenter	Swyddog Cynllunio, Parc Cenedlaethol Eryri
Ross Anthony	Gweithiwr achos, Adeiladau a Mannau Hanesyddol
Bob Kindred	Aelod o'r Cyngor, Sefydliad Cadwraeth Adeiladau Hanesyddol
Owain Gwilym	Cyfarwyddwr Gweithredol Celfyddydau Anabledd Cymru — Llandeilo
Sarah Younan	Aelod o Gyngor Amgueddfa Cymru a Chyngor Celfyddydau Cymru
Devinda De Silva	Ymarferydd Creadigol Llawrydd ac Aelod o Gyngor Celfyddydau Cymru
David Cleary	Gweithiwr llawrydd — Celfyddydau Anabledd Cymru / Amdani — Cyngor Llandudno
Rosemary Thompson	Arweinydd diwylliannol cyhoeddus a byddar
Trisha Ashley	Nofelydd a chyn-weithiwr Cadw
Karen Morris	Cyn-brifathro, dysgwr Cymraeg ac ymwelydd niwroamrywiol
Sara Beer	Actifydd celfyddydau anabledd llawrydd a pherfformiwr
Nia Williams	Cyfarwyddwr Dysgu a Rhaglenni Cyhoeddus, Amgueddfa Cymru
Janice Lane	Cyfarwyddwr Profiad Ymwelwyr, Amgueddfa Cymru
Kate Clarke	Cyn-Brif Weithredwr Cadw 2015–17

Crynodeb 90 eiliad

<p>Cefndir</p>	<p>Yn 2017, cafodd strwythur llywodraethu newydd ei roi ar waith ar gyfer Cadw. Roedd y strwythur hwn yn golygu bod Cadw yn parhau i fod o fewn Llywodraeth Cymru ond daeth yn Asiantaeth Fewnol gyda rhywfaint o ryddid a hyblygrwydd y tu allan i ffyrdd arferol o weithio'r gwasanaeth sifil, a fyddai'n ei alluogi i gyflawni ei ddiben cadwraeth ac ymgysylltu.</p> <p>Mae'n bum mlynedd bellach ers cyflwyno'r newidiadau hyn, ac mae'r Dirprwy Weinidog wedi gofyn am adolygiad i weld pa mor effeithiol fu'r model llywodraethu newydd. Yr arolwg hwn oedd cyfle staff Cadw i roi adborth ar ba ddarnau o'r model llywodraethu sy'n gweithio a pha rai sydd ddim.</p> <p>Nid oedd yr arolwg yn asesu pa mor dda y mae Cadw yn perfformio, roedd yn edrych ar ba mor dda yr oedd y strwythur newydd yn galluogi staff i gyflawni'r weledigaeth o 'Gymru lle mae pawb yn gofalu am ein lleoedd hanesyddol, yn cael eu deall a'u rhannu gan bawb' a'n cenhadaeth o 'ofalu am ein lleoedd hanesyddol, gan ysbrydoli cenedlaethau'r presennol a'r dyfodol'.</p> <p>Cwblhaodd 88 o staff Cadw yr arolwg, a oedd yn fyw rhwng 16 Mai a 9 Mehefin 2023.</p>
<p>Gweithlu llawn cymhelliant</p>	<p>Mae staff Cadw yn rhannu angerdd cyffredin am eu gwaith ym maes treftadaeth. Yn gyffredinol maent yn parchu sgiliau ei gilydd ac yn mwynhau'r cyfeillgarwch. Mae'r rhai mewn rolau sy'n wynebu ymwelwyr yn mwynhau rhannu eu hangerdd ag ymwelwyr. Mae ymdeimlad o falchder o weithio i Cadw, gan wybod bod y swydd yn gwneud gwahaniaeth go iawn.</p>
<p>Recriwtio yw'r mater mwyaf arwyddocaol i fynd i'r afael ag ef</p>	<p>Recriwtio yw'r rhwystr mwyaf i staff wneud eu gwaith yn effeithiol. Mae bron pob un (87%) yn anghytuno bod gan Cadw y rhyddid sydd ei angen arno i recriwtio staff. Y prif faterion recriwtio yw:</p> <ul style="list-style-type: none"> • Mae'r broses yn cymryd llawer gormod o amser. • Mae recriwtio LIC wedi'i sefydlu ar gyfer rolau gwasanaeth sifil mwy generig ond nid yw'n cydnabod rolau arbenigol niferus Cadw yn iawn. • Mae Cadw yn sylweddol brin o staff i gyflawni ei amcanion ond mae recriwtio wedi'i gyfyngu. gan gyfrif penaethiaid Llywodraeth Cymru.
<p>Cefnogaeth i brentisiaid a gwirfoddolwyr</p>	<p>Mae 91% yn teimlo ei bod yn bwysig i Cadw gael prentisiaid ac mae 64% yn teimlo ei bod yn bwysig cael gwirfoddolwyr.</p>
<p>Angen adolygu strwythur graddau</p>	<p>Mae 18% yn teimlo bod strwythur graddio LIC yn gweithio ar gyfer holl rolau Cadw, ond mae 50% yn anghytuno. Mae rhai yn teimlo bod angen ailwampio graddau ceidwaid, angen gwell cydnabyddiaeth o arbenigedd mewn rolau arbenigol a llai o ddisgwyli i staff weithio uwchlaw'r gradd cyflog.</p>
<p>Rhannu barn dros le Cadw o fewn Llywodraeth Cymru</p>	<p>Mae cefnogaeth gref i Cadw barhau fel un adran, nid dwy, gan ei fod yn caniatáu cydweithio tuag yr un nod. Mae barn yn cael ei rhannu'n fwy ynghylch lle y dylai Cadw eistedd yn y Llywodraeth. Mae 53% yn cefnogi ei le o fewn Diwylliant, Chwaraeon a Thwristiaeth, ond mae 36% o blaid iddo fod yn annibynnol, y prif reswm am hyn yw y byddai'n caniatáu i Cadw y rhyddid sydd ei angen, yn enwedig yn fasnachol.</p>
<p>Adborth ar y Bwrdd</p>	<p>Mae 44% yn credu bod y Bwrdd yn helpu Cadw i gyflawni ei genhadaeth. Teimlir bod gan y Bwrdd gyfoeth o brofiad i'w gynig, ac mae staff yn ei werthfawrogi pan fydd aelodau'r Bwrdd yn gwneud eu hunain yn weladwy, megis ar ddiwrnodau staff.</p> <p>Fodd bynnag, mae nifer o ffyrdd y mae staff yn credu y gallai'r Bwrdd ychwanegu mwy o werth, gan gynnwys bod yn fwy gweladwy, deall beth mae staff Cadw yn ei wneud, egluro penderfyniadau yn fwy a bod yn fwy pendant o fewn Cadw a thuag at weinidogion y Llywodraeth.</p>
<p>Manteision gweithio gartref cryf, ond collir cyfathrebu effeithiol</p>	<p>Mae llawer o staff bellach yn mwynhau'r hyblygrwydd o weithio gartref ac nid ydynt am weld hyn yn cael ei ddileu. Fodd bynnag, mae rhai'n teimlo bod diffyg cyfathrebu ar ôl Covid oherwydd llai o ryngweithio. Mae hyn yn effeithio'n benodol ar ymwybyddiaeth o'r hyn y mae timau eraill yn ei wneud. Mae'r awgrymiadau'n cynnwys diwrnodau rheolaidd yn y swyddfa (ac eithrio rolau llawn ar y safle) ac arweinyddiaeth fwy rhagweithiol gan uwch reolwyr i gyfleu'r hyn sy'n digwydd o'r brig i lawr.</p>

6.13 Atodiad 13 — *Blaenoriaethau ar gyfer Amgylchedd Hanesyddol Cymru*, Medi 2018.

6.15 Atodiad 14 — Geirfa Termau

Swyddog Cyfrifeg Ychwanegol (SCY)	Gall y Prif Swyddog Cyfrifo — Ysgrifennydd Parhaol Llywodraeth Cymru — enwebu a dirprwyo pwerau gwneud penderfyniadau i 'Swyddogion Cyfrifo Ychwanegol' sy'n gorfod sicrhau eu bod yn cynnal safonau uchel o reolaeth ariannol o fewn eu maes cyfrifoldeb dynodedig.
Sefydliad hyd braich	Term a ddefnyddir i ddisgrifio ystod o gyrff cyhoeddus sy'n gweithredu'n annibynnol ar lywodraeth ganolog. Mae'r rhain yn cynnwys asiantaethau gweithredol, cyrff cyhoeddus anadrannol ac adrannau anweinidogol a chorfforaethau cyhoeddus.
Cynllun Datblygu'r Gynulleidfa	lasbrint ymarferol ar gyfer cynulleidfaoedd sy'n tyfu, cynyddu cyrhaeddiad a meithrin perthnasoedd dyfnach trwy ymdrechion cyfunol cyd-weithwyr a rhanddeiliaid.
Bwrdd Cadw	cadw.llyw.cymru/amdanom-ni/beth-a-wnawn-ni/pwy-ydyn-ni
Dogfen Fframwaith Asiantaeth Fewnol Cadw	Dogfen sy'n amlinellu sut mae Cadw yn cael ei lywodraethu a'i reoli. Dogfen ffurfiol o ddirprwyaeth a rhyddid mewnol a roddwyd i Fwrdd Cadw a swyddogion, gan gynnwys cynrychiolwyr ariannol, gweithredol, Adnoddau Dynol, caffael a dirprwyaethau eraill i alluogi Cadw i weithredu'n effeithiol ac yn effeithlon.
Brand Cymru/Wales	assets.wales.com/pages/brand
Adran Diwylliant, Chwaraeon a Thwristiaeth	Mae'r Adran Diwylliant, Chwaraeon a Thwristiaeth yn adran o fewn Llywodraeth Cymru sy'n eistedd o fewn Grŵp yr Economi, Trysorlys a'r Cyfansoddiad.
Deddf Cydraddoldeb 2010 a'r naw nodwedd warchoddedig	Discrimination: your rights: Types of discrimination ('protected characteristics') - GOV.UK (www.gov.uk)
Pwyllgor Gwaith Llywodraeth Cymru	Y Pwyllgor Gwaith yw'r fforwm gwneud penderfyniadau strategol o fewn Llywodraeth Cymru sy'n cefnogi'r Ysgrifennydd Parhaol yn ei rôl fel Prif Gyngorydd Polisi i'r Prif Weinidog, Prif Swyddog Cyfrifyddu a Phennaeth gwasanaeth sifil Llywodraeth Cymru
Comisiynydd Cenedlaethau'r Dyfodol Cymru	www.futuregenerations.wales/cy/
Gwasanaeth amgylchedd hanesyddol	cadw.llyw.cymru/amdanom-ni
Partneriaeth Cymru Hanesyddol	Partneriaeth strategol rhwng Cadw, Amgueddfa Cymru, Llyfrgell Genedlaethol Cymru a Chomisiwn Brenhinol Henebion Cymru. Eu nod yw cydweithio a rhannu arbenigedd ar draws y sector treftadaeth yng Nghymru.
Model eithrio mewnol	Dull awgrymedig o weithio y tu allan i arferion recriwtio a gwaith a pholisïau arferol y llywodraeth i gyd-fynd â natur arbenigol gwaith Cadw, er mwyn creu polisïau cyflogaeth pwrpasol.
Asiantaeth Fewnol	Isadran o fewn Llywodraeth Cymru sy'n gweithredu yn unol â pholisïau a gweithdrefnau safonol ac sy'n atebol yn uniongyrchol i weinidogion. Yn amodol ar angen busnes y cytunwyd arno, bydd yr isadran wedi dirprwyo rhai eithriadau, amrywiadau ac ychwanegiadau i bolisïau neu weithdrefnau i'w galluogi i weithredu'n effeithiol ac yn effeithlon.
Rhestriad	cadw.llyw.cymru/cyngor-a-chymorth/asedau-hanesyddol/adeiladau-rhestredig/deall-rhestru
Rhaglen Lywodraethu	Dogfen gan Lywodraeth Cymru yn rhestru'r ymrwymïadau y mae'r blaid wleidyddol mewn grym yn anelu at eu cyflawni o fewn eu cyfnod o 5 mlynedd mewn grym.

Amserlennu	cadw.llyw.cymru/cyngor-a-chymorth/asedau-hanesyddol/henebion-cofrestredig/deall-cofrestru#section-cyflwyniad
Uwch Dîm Gweithredol (Cadw)	Uwch grŵp gwneud penderfyniadau o fewn Cadw sy'n cynnwys Dirprwy Gyfarwyddwr Cadw a phenaethiaid gwahanol ganghennau o fewn Cadw, sef Eiddo mewn Gofal, yr Amgylchedd Hanesyddol, Datblygu Busnes a Marchnata, a Gwasanaethau Cyllid a Chorfforaethol.
Model Cymdeithasol o Anabledd	www.scope.org.uk/about-us/social-model-of-disability/
Grŵp Gorchwyl a Gorffen	Daeth grŵp o arbenigwyr dethol ynghyd i weithio ar dasg neu amcan penodol â therfyn amser y mae angen ei gyflawni.
Saith Egwyddor Bywyd Cyhoeddus (a elwir hefyd yn Egwyddorion Nolan)	www.gov.uk/government/publications/the-7-principles-of-public-life
Deddf Llesiant Cenedlaethau'r Dyfodol (Cymru) 2015	www.llyw.cymru/deddf-llesiant-cenedlaethau-dyfodol-yr-hanfodion

Castell Caernarfon, Gwynedd.

